

CYÀKUDYÀ CYÀ NYUMÀ

MU MUVÙ WÀCÌ



Itabuuja naka, itabuuja naka,
Bintu byônsò bidi mwa kwenzeka, itabuuja . . .

Mushindu kaayi, mpindyewu mushindu ewu ne:

Mpindyewu ngîtàbùùjì, mpindyewu
ngîtàbùùjì,
Bintu byônsò bidi mwa kwenzeka, mpindyewu
ngîtàbùùjì;
Mpindyewu ngîtàbùùjì, mpindyewu
ngîtàbùùjì,
Bintu byônsò bidi mwa kwenzeka, mpindyewu
ngîtàbùùjì.

Twǎnjàayi kushaala biimanyine kuulu mpindyewu, ne mitu yetu miinyika.

Mukalenge, swaku bwa eci kaciikadi anu musambu patupu to, kadi cìikalè ndondo mene ya myoyi yetu yimba ne díyi dikole ne: “Mpindyewu ngîtàbùùjì!” Bayiidi bàákamba musangu kampana, paanyima paa Yesu mumane kwenza byenzedi bya bukole ku búngì bwabi, bàákamba ne: “Mukalenge, mpindyewu twitabuuji.”

Yesu kwambaye ne: “Nwitabuuji mpindyewu’s?”

² Bòbò kwamba ne: “Twitabuuji ne Wèwè udi mumanye maalu ônsò ne kabyena bikengela bwa muntu aKulongeshe to.” Pa nanku, Taatù, diloolo edi nyewu tufika ku dyumvwa ne Wèwè kwêna dijinga ne dyetu dilongesha nansha, kadi twètù mbadi dijinga ne Dyebe Wèwè. Pa nanku tudi tulomba bwa Wèwè utulongeshe mwa kusambila, mwa kusômba, ne mwa kwitabuuja. Enzaku nanku, Mukalenge, mu edi disangisha dya diloolo edi edi. Patwikala bapangile cintu kampana, utupeesheci, Mukalenge. Tudi tulomba nunku mu Dîná dya Yesu. Amen.

³ Ndi mumanye ne bààbúngì beenu mbiimane cyakabidi kuulu diloolo edi. Ne, pambelu, mvwa musambakeene ne tusumbu twa bantu bamba ne kabavwa ne mushindu wa kubwela muneemu to, kadi biikàle bateelejila ku bisanji byabo mu tushinyi tushiileshiilangane. Nenku mpindyewu netuteete anu bwa kwenzaku ne lukasa lwônsò diloolo edi, mu dyalumingu diloolo, biikàle tufila díbà adi bwa kusambidila babeedi, kwenza mulongo wa babeedi mutudi mwa kuwenza mwab’ewu. Kadi

tudi tulambula disangisha dya diloolo edi ku disambidila dya babeedi.

⁴ Nenku ndi muswe bwa nwênù kwikala biibaka mpindyewu mu. . . Mèyà a Cijila a Nzambi aa, mu Diitabuuja adi, Diitabuuja dya díbà edi. Diitabuuja! Nebikengele diitabuuja dyàbúngì kupita divwaku kwònsò eku mu cikondo kana cyònsò, bwalu edi bidi bikengela diikalè diitabuuja dya dyambwibwa, bwa kwangaciibwa muulu. Pa nanku tudi baswe bwa nwênù kwitabuuja diloolo edi mu byònsò binudi bamone, bumvwe, Dìyì dinudi bumvwe diyishiibwe, bimanyinu ne—ne maalu a kukema binudi bamone byenjiibwe. Tudi baswe bwa nwênù kwambakaja byònsò abi mushiki mu myoyi yenu, ne kwelanganapu meeji, bwa ne n’Nzambi anyi kì n’Yèyè.

⁵ Mbyenze anu bu Elisha wa kale, pàakambàye ne: “Piikalàbi ne Nzambi udi Nzambi, Mukwacilaayi mudimu.” Nenku piikalàbi ne Yesu udi mutu mupungila makunyi wa bintu byònsò bwa mwena Kilisto, nenku ndi mèmè ngeela meeji ne bivwa bikengela twètù kulekelela bintu bikwabo byònsò bwa kushaala balamate kudiYe. Vulukaayi ne, Yèyè ki Mutu mupungila makunyi, Yèyè ki Mutooto wa ku Nord, Yèyè ki Nkàmisha, Yèyè ki Cyeyemenu. Nenku piikalàbi ne Yèyè ki Mutooto wa ku Nord. . . Kudi cintu anu cimwepele citu cileeja mutooto wa ku nord, nkaleeji-nord keenu kanutu nwenda naaku mu mazuwa a màyi aku. Ne Kaleeji-Nord kândi mèmè nteeta kunuleeja bwa nwênù kwikala kwenda naaku mu mazuwa a màyi n’Dìyì, ne Dìyì ditu misangu yònsò diMufunkuna anu Yèyè.

⁶ Ne tudi tudyumvwa anu bu badi bapicila mu cikondo cinene cya dikenga ne mateeta, dipampakana dya cikondo ne dikenga munkaci mwa matunga, ne maalu a mishindu yònsò munkaci mwa kwenzeka, ne misangu mikwabo ntu ndisangana mujinga kudi maalu bu. . . Kwònsò kùndi ntangila, mbyenze anu bu pa. . . mu mazuwa pa mbû. Ne biikàle bampe bujitu bwa Mazuwa awu. Kadi netukafike munyi? Kadi ki divwala dilwalwà edi ne lusongo lutooke, dinene dipite mazuwa aanyi mèmè awu misangu lukama. Kadi netuàbàndè ònsò awu, ku dimwe ku dimwe. “Tudi batambe ne bacimunyi mu Yèyè.” Kapiteena, Kapiteena Munene, ki udi mukwate nshinga lwà kundekeelu kwa mazuwa, Yèyè ki waàkòka bwa kuàpicisha. Netubande dimwe ne dimwe dya kudiwu.

⁷ Mpindyewu, diloolo edi, bwa twètù kulwijakaja bwa kunupatulaku kumpala kwa díbà. . . Tudi twanyisha dyendesha dyenu dya mashinyi ntanta mile, ne bikwabo, ne mushindu udibi bikengela bwa nwênù kunyeemesha mashinyi, ne didifila didi dikengela bwa nwênù kwenza. Nenku, nwamonu’s, aci cidì cimpeesha dijinga dya kushaala anu mwimane ne kutungunuka anu ne kwakula ne kwenza byònsò bìndì mwa kwenza abi bwa kunukwacisha. Kadi pândi nsanganyiibwa mwab’ewu ndi nteeta bwa kudyenzeja mu kantu ne kantu kândi ne mushindu

wa kwenza aku, bwa kufila dikwacisha bwa dībà ditudi apa mpindyewu ewu edi. Pashiishe udi wangata... Wèwè mupe bantu bintu byàbûngì musangu umwe kabena mwa kubivuluka to. Bikengela wèwè—wèwè kwangata cintu anu cimwepele ne kucikwata citeeka kumpala kwa muntu too ne piikalàye mucimone. Ne dībà adi padiye ucyangata cishindamija bîmpè mu mwoyi wende, dībà adi neikalè mwa... pashiishe kumulongesha cikwabo cintu. Anu ku cidya ne ku cidya mutudi twenda tuya amu.

⁸ Mpindyewu, nusambile ne nwikalè bakoleshe mwoyi, ne nwikalè biitabuuje mpindyewu diloolo edi bwa dyondopa. Ncyèna ngeela meeji ne kudi lukonko kampanda mu meeji enu amu pa bidi bitangila dībà ditudi ne mwoyi to. Ncyèna ngiitabuuja ne kudi lukonko kampanda mu meeji enu amu pa bidi bitangila ne Nzambi udi munkaci mwa bantu Bende anyi kènàmu to. Ndi ngiitabuuja ne nwènù bônso nudi nwitabuuja aci. Nenku ndi... Kakwena mpatà mu meeji aanyi pa bidi bitangila aci to. Ne ndi—ndi—ndi mumanye ne cisamba cyanyi, balunda baanyi, balunda baa Kilisto, bânà baa—baa Kilisto, badi biitabuuja nanku.

⁹ Nenku bidi bimpeesha disanka dinene dya kufika ku dimona ne paudi umanya ne udi ne Mukenji wa kudi Nzambi, ne uwupa bantu ne umona mudi bantu abu bandamuna ku Cyôci aci. Dībà adi udi utangila paanyima wamba ne: “Twasakidila, Taatù.” Kaa, ndisanka kaayipu dya kumona pa dībà adi mùdì bânà badya Dyâmpà didì dibâtùmina! Nudi nufika ku dyumvwa ne cyôci aci ncikeena-kumona cya kukaadi bidimu, anu ku tabernacle eku mene anyi? Ncya bushuwa: “Dyâmpà dya Mwoyi.” Mwaneetu Neville, wèwè’s udi mucivuluke, pâmwâpa. Cikondo cilenga cya dikema!

¹⁰ Mpindyewu tubuululaayaaku, panwikala baswe kulonda kubala anyi kubifunda, anu... Ncitu ngiitabuuja ne mbikumbane bwa kwenza disangisha kakuyi dibala dya Dîyì dya Nzambi ne kwelaku ndambu wa nseke to, piikalàbi ne neciikalè mudimu wa dyondopa anyi wa mushindu kana wônso. Tudi bônso bumvwe. Kakwena beenyi munkaci mwetu to, ngeela meeji. Kadi tudi bônso bumvwe cidi dyondopa. Kì ncintu cidi muntu ukwenzela to; ncikaadi Nzambi mumane kukwenzela. Lupandu ludi paalu anu mu njila umwèumwè awu. Cintu cimwepele, cidi ne, kufikisha bantu ku diitabuuja ne m’Bulelela. Ne Nzambi udi ucilongesha mu Dîyì Dyende ne pashiishe ucijaadikila aba badi baswe kuCiitabuuja, bwalu Yèyè mmwambe ne: “Bintu byônso bidi mwa kwenzeka bwa aba badi biitabuuja.”

¹¹ Wèwè udi wamba ne: “Kakwena cidi kaciyi mwa kwenzeka bwa Nzambi to.” Udi witabuuja aci anyi? Kakwena cidi kaciyi mwa kwenzeka to, nansha kùdì wèwè peebe. “Bwalu bintu byônso bidi mwa kwenzeka bwa aba,” (Nzambi m’Mupersona

umwepele) “bwa aba badi biitabuuja.” Nwamonu anyi? Pa nanku kakwena cintu nansha cimwe cidi kaciyi mwa kwenzeka bwebe wêwè nansha, bwebe wêwè, bu wêwè anu mwa kwitabuuja naka.

¹² Mpindyewu mu Bakalenge wa Kumpala, nshapita wa 17, ndi muswe kubala mvensa mwandamutekete ya kumpala ayi, bu Mukalenge mwa kwanyisha.

Nenku Eliya mwena Tiishiba, uwu wa beena Galada, wakambila Aakaba ne: Bu mudi MUKALENGE Nzambi wa Izaleela ne mwoyi, yêyè mwena kumpala kùndi ngiimana, kakwakwikalaku nì ndumuma nì mmvula bidimu byônso ebi to, anu mêmè mwambe dîyè.

Nenku dîyè dya MUKALENGE dyakalwa kudîye, dyamba ne:

Umuka apa, kudimuka kudi dîbà dipatukila, kudimuka uye kudi dîbà dipatukila, ne usokome pabwîpî ne kasulu kaa Keelita, kadi katangilangane ne Yadene.

Nenku nebyenzeke ne, newikalè unwa mâyi a kasulu aku; nenku Mêmè ndi mutumine bikololo dîyè bwa kwikalabi bikudiisha kwôkò aku.

Monaayi ne, “bikudiisha kwôkò aku,” kakuyi mwaba kampanda mukwabo to. “Kwôkò aku!”

Nenku yêyè wakaya ne wakenza bilondeshile MUKALENGE: anyi dîyè dya MUKALENGE: bwalu wakaya kasômbela pabwîpî ne kasulu kaa Keelita, kadi katangilangane ne Yadene.

Nenku bikololo bivwa bimutwadila mâmpà ne minyiinyi mu dinda, ne mâmpà ne minyiinyi diloolo; ne yêyè uwu unwa mâyi a kasulu aku.

Nenku ki kwenzekabi paanyima paa cikondo kampanda ne, kasulu aku kukamaku, bwalu kakuvwa kuloke mvula pa buloba nansha.

¹³ Mukalenge asakidileku mabenasha Ende ku dibala dya Dîyè Dyende. Nenku mpindyewu, diloolo edi, ndi muswe kwangacila cyena-bwalu mwaba awu, ciinyika dînà ne: “Cyakudya cya nyuma mu movù Waci.” Mu dinda emu tuvwa ne di—dileesona pa—pa “Kukwacila Nzambi mudimu, anyi kuteeta kuMukwacila mudimu kabiyi . . .-biyi mu cikondo, movù, mwaba, anyi muntu mene.” Kadi mpindyewu edi didi ne: *Cyàkudya Cyà Nyumà mu Movù Waci.*

¹⁴ Muprofeta ewu, Eliya, tudi bamanye kakese menemene pa bidi bimutangila. Kadi tudi bamanye ne yêyè uwu musadidi wa Nzambi, ne musadidi wa Nzambi bwa diine dîbà adi.

¹⁵ Ne Nzambi ukaadi mukwate mudimu ne Nyuma Wende uwu pambidi paa Eliya awu, misangu yisatu mijima, ne

mmulaye misangu mikwabo yibidi; misangu yitaanu, bwa ngàsà. Wàkawkàta Nende mudimu pambidi paa Eliya; Wàkalwa pambidi paa Elisha mu bitupa bibidi; ùvwa pambidi paa Yone Mubatiji; kabidi udi ne cya kulwa anu bwa kutwala Mukaji musela wa baa Bisamba bya bende; ne nealwe ne Mòsà bwa kufikisha beena Yuda kwabo. Aci ncyà bushuwa. Misangu yitaanu yidi Nzambi ulaya bwa kukwata mudimu ne Nyuma wa Eliya, kadi mumane kucyenza misangu yisatu.

¹⁶ Mpindyewu, muprofeta munene ewu, katwena bamanye ne wàkafùmina penyi to. Tudi bamanye ne ùvwa mwena Tiishiba. Kadi mushindu mwine wakalwaye . . .

¹⁷ Tudi bamanye kakese pa bidi bitangila baprofeta. Katwena bamanye kutubo bafumina to. Mpuukapuuka menemene . . . Bu mudibi ne, mêmè nciyu mumanyeku nansha umwe wa mufumine mu ekeleeziya anyi mwikalèku ne dilondangana dya bankambwa paanyima pende to. Bavwa anu bantu baa patupu bàvwà kabayi ne bwòwà to, ne, misangu yàbùngì, kabayi balonge kalaasa to. Ne kabavwaku bafunde mikanda to, bôbò biine. Yeshaayi ne Yelemya, babidi abu, baakafundaku ndambu wa maalu, kadi muntu munene Eliya ewu kaakafundaku yêyè cintu nansha cimwe to. Bààbùngì baa kudibo kabaakafundaku to; pàmwàpa kabavwa bamanye kufunda to. Kadi bavwa bantu bavwa bakayapale. Kakwenaku muntu nansha umwe mu Bible bu baprofeta baa kale abu to. Bavwa beela makalenge kadyombo, bamfumu, bisamba, maekleeziya, ne bikwabo byònsò, ne biikàle anu kacya biimana kamungulu pa Dìyì dya Nzambi, ne Nzambi ujaadika ne bavwa mu bulelela. Bavwa bantu bakayapale baa dikema.

¹⁸ Kadi Eliya ewu ki uvwa mutambe kwikala mukayapale wa ku bôbò bònsò. Ùvwa muntu wa mu cipeela. Wàkapàtukila mu cipeela; ùvwa yêyè musòmbèle mu cipeela. Bible mmwambe ne yêyè uvwa muvwale myòsà. Uvwa mudijìngile ciseba cya mukooko, ne cipese cya ciseba, anyi ciseba cya kaameelu cyonya mu cifuka, mutambe . . . myedi ku cibanga kwònsò, nenku ndi ndifwanyikijila ne uvwa ne mmwenekelu wa muntu mukayapale wa dikema, anu pa kumutangila piine.

¹⁹ Kadi katuvwa . . . kadi kabaakafwa bònsò to. Kabatu bafwe bònsò—bònsò to. Mu matuku a Nsangilu wa Nicée, bààbùngì baa kunidi bàkaadi babale *Nsangilu Wa Nicée Wa Èkèleeziyà Wa Ku Cibangidilu*, paakaswabo kumuvwija bulongolodi ne kushipa ekeleeziya mikwabo yònsò, bwa kwenzayi umwepele, paakenzabo Nsangilu wa Nicée awu, bantu bakayapale baa bu Elisha baakalwamu biikàle bafumina mu cipeela, biikàle badya anu bisoosa nkaayaabi; bantu banene bakayapale. Kadi bantu baa myânzù mitumbuke, bantu baa kuulu, mu bumfumu bwa Constantin, ne bikwabo, kupuwishabo dyabo dìyì. Bwalu bôbò abu, bu muvwabo baprofeta, bavwa bamanye ne bivwa bikengela bwa lutete lwa blé lwa Ekeleeziya Mukaji-musela lumate mu

buloba, bya mwomumwe ne mwakakengelabi bwa lutete lwa blé mu Mubaki lumate mu buloba. Nenku ki mwaba awu kushaalalu mu buloba munda mwa bidimu cinunu.

²⁰ Ki bwa cinyi badi bafunda mu mikanda leelu ewu ne: “Nzambi wa cinyaanya awu udi penyi uvwa mwa kushaala kacya wimana mutangile, umona muvwabo bashipa bânà bakese, ne basunsula bakaji kudi nyama ya ntambwe, cibi kacya anu wasomba mu maulu kayi ne cidiye wamba pa bwalu abu awu?” Kî mbamanye Dîyì to. Bidi bikengela bwa lutete lwa blé alu lumate mu buloba. Mmunyi muvwa Nzambi mwakane mufwanyine kushaala mwimane kacya watangila Mwan’Ende Sungasunga ufwa ne biikàle baMutwila makodi, ne bikwabo? Kadi’s mbilondeshile Dîyì, bikengela byenzeke. Ne mushindu awu’s ki udibi nansha too ne dîbà ditudi twakulangana edi.

²¹ Muntu ewu, ùvwa muntu munene. Ûvwa kumpala kwende ne lukongo lubiipe. Aakaba nguvwa mfumu, wende tatwëndè kumpala kwende uvwa mubi. Kacya anu ku Solomo, kuvwa anu bamfumu babi balondangane ewu kumpala ewu upingana. Kadi muntu ewu, Aakaba, wâkakòokeshu bidimu makumi abidi ne bibidi mu Samaaleya ewu, ki uvwa mubi kubatamba bônso. Yèyè kadi ki uvwa wa cyena leelu wa dikema. Ûvwa witabuujwa mu maalu a ntendeleelu, cya bushuwa. Kadi wâkavwija bintu byônso anu mu mmwenenu wa cyena leelu. Ûvwa ne baprofeta bende nkama yinaayi baa beena Ebelu, bônso abu balongesha tulaasa ne biibidija bilenga. Nzambi kumutuminaye umwepele kadi kayi muswe kwitabuujwa aci to, ne yèyè awu uvwa ng’Eliya.

²² Kadi Eliya, mwena Tiishiba ewu, ùvwa muntu wa mu cipeela. Kayi muntu wa mubidi mufinunuke to; ùvwa muntu mukayapale. Ki dîngà dituku, paanyima paa Aakaba mumane kwenza mpekaatu mu mushindu wa Nzambi kaciya mwa kubitwalaku kabidi to, Yèyè kwakula ne Eliya mu cipeela. Ki yèyè udi wenda upweka ne njila mutangile ku Samaaleya ewu, mushindu wûntù mfwanyikija misangu yâbûngì awu; pâmwâpa mwedi mutooke mutoloke ku cibanga kwônso, mutu dîbàla mwikàle ubalakana ne muunya, twîsù tukese twa muntu mukulakaji atu, kwaka naka ne dikombo mu cyanza, ne mimwemwe ku mishiku, ùya tamakatamaka buludi too ne kudi mfumu wa Izaleela, e kwambaye ne: “Kùdi . . . Nansha lumuma kalwakumataku to too ne pângàlùbìkìlà mêmè.”

²³ Nzambi atupeku bantu bu nanku’s, nwamonu’s, bantu badi bamanye cidibo benza ne EMU MMUDI MUKALENGE WAMBA.

²⁴ Mpindyewu, tudi tusangana ne kumpala kwa kwenzaye ciine eci, Nzambi wakanji kumubiikila. Nzambi ukaavwa mwakule nende, ki bwa cinyi, kavwa uciina cintu nansha bamba ne ncinganyi to. Kavwa uciina bwa mukenji wende, bwa ne nkwepi kwabengabi kwenzeka to; ùvwa mumanye anu ne nebyenzeke!

Ūwva mumanye ne bivwa bilondeshile Dîyì dya Mukalenge, ne ùwva mumanye ne yêyè nguwva muprofeta wa Nzambi wa dîbà adi. Ki bwa cinyi nansha mfumu mumukose mutu, mumwele mu buloko, cyònsò civwabo bafwanyine kwenza aci, bwende yêyè kacivwa ne civwaci cishintulula to; yêyè uvwa ne mudimu mumutuma naawu ne, “EMU MMUDI MUKALENGE WAMBA,” anu mumpala mwa mfumu mwine amu. Ewu’s mmuntu mukayapale wetu wa! Kadi kumpala kwa kwenzaye ciine eci, kwa kudyanjilaye kwamba bwa mushipu munene ewu. . .

25 Bwalu Nzambi kaakulekelaku mpekaatu utungunuka anu nanku kayi unyookiibwa to. Kudi ne cya kwikala dinyooka. Mukenji udi ne dikwacisha ku cinyi piikalàwu kawuyi ne—ne dinyooka? Mbifwanyine kwikala ne dikwacisha ku cinyi, bwa kwamba ne, “kupita midilu mikunze ne mashinyi nkushipa kwa mukenji,” padiku kakuyi cibawu ciwulonda, anyi kakuyi dinyooka diwulonda? Awu kî mmufwanyine kwikala mukenji to. Bya mwomumwe kabidi kudi dinyooka bwa mpekaatu. Ne padi Nzambi wela mukenji, kadi mwine mukenji—mukenji awu bawukandameena, dîbà adi bikengela kwikalè dinyooka bwa cyôci aci.

26 Kadi ditunga edi dikaavwa dishipe mikenji Yende yònsò. Kaa, bôbò’s bavwa ne ekeleeziya munene, bavwa ne ntempelu. Bavwa ne bantu balonge tulaasa bûngì cyanaana. Bavwa ne baprofeta mu ditunga dijima, bavwa ne tulaasa tuvwa bôbò biine abu balonga, babapatulamu byenze bu ku mashinyi. Nenku bavwa ne baprofeta ku bûngì bwabo, bavwa ne baakwidi bûngì—bûngì cyanaana, bavwa ne bafundi bûngì cyanaana, ne bavwa ne ntendelelelu bûngì cyanaana, kadi biikale kule ne Dîyì dya Nzambi. Ki Nzambi kubiikila muntu pambelu paa yònsò ya ku milongo yabo ayi, ne kumutumamu ne EMU MMUDI MUKALENGE WAMBA.

27 Kadi anji monaayi mudiYe utabaleela bàdi Bende Yêyè mwine. Kumpala kwa Yêyè kutuma muprofeta ewu ne mukenji, Wākamba ne: “Eliya, pweka uye kambila Mfumu Aakaba maalu aa. Nenku mpindyewu, pawamana kumwambila, umuke umushiye ne lukasa lwònsò, bwalu Ndi mulongolole mwaba wa wêwè kuya mu cikondo cya mushipu aci. Mêmè ki wākukùba, Eliya, bwa wêwè anu muyiishe Dîyì Dyanyi, mwenze cîndì Mêmè nkwambila bwa kwenza aci.”

28 Mpindyewu nêngiikalè mwa kufwanyikija mudimu munene wa bwambi ewu, diloolo edi, wa Eliya ne cikondo cya Eliya, ne dîbà ditudi twètù mpindyewu edi. Ndi mêmè ngiitabuujja ne ncimfwanyi cipwangane. Ndi ngeela meeji ku matunga. . . mêmè mwa. . . bu twètù ne dîbà dya kwalukila cyanyima, kadi ndi muswe kufila dîbà dyàbûngì ku mulongo wa babeedi.

²⁹ Pa nanku bu twètù mwa kwalukila cyanyima bwa kumona, Izaleela wakakwata Palestine pa bishimikidi bimwebimwe bya bwena bitwakakwata peetu États-Unis ewu. Twâkabwela mu États-Unis emu twètù kwipata beena kalaba, bàvwà biikàle ba-Indiens, ki twètù kwangata buloba e kushaalabu bwetu. Nenku ki muvwa Izaleela pende mubwele mu Palestine, ku bulombodi bwa Yoshuwa, bwa Nzambi, kwipata beena kalaba ne kwangatabo buloba.

³⁰ Ne bamfumu baabo baa kumpala bavwa bantu baa bukole: Davidi, Solomo, ne bantu banene. Bamfumu beetu baa ditunga baa kumpala bavwa bantu banene: Washington, Lincoln, ne bakwabo. Pashiishe ndekeelu wa byònsò bamfumu baa ditunga anyi bamfumu abu kubangabo benda bashaala babole dîbà dyònsò, ki ndekeelu wa byònsò kufikabo ku Aakaba ewu. Cimfwanyi menemene, cifwanangane anu ne cya dituku dyetu edi. Ne bantu bakaavwa bashaale baa cyena leelu mu mushindu wa kabaciyiku mwa kuteeleja Dìyì dilelela dya Mukalenge to.

³¹ Nenku nudi mwa kudifwanyikijilaayiku peenu's, kudi bantu baa cyena leelu baa mushindu awu abu, cidì musadidi mulelela wa Nzambi mufwanyine kumweka bwabo bòbò. "Mona's, yèyè's uvwa mupàle, ùvwa mujimije lungenyi. Cintu bu nanku kî ncifwanyineku kwikalaku nansha." Bavwa batendeleedi, kabidi batendeleedi baa dipòkò. Bavwa ne balume baa meeji matooke, bavwa ne bantu baa meeji matooke. Bavwa batendeleedi baa dipòkò.

³² Pa nanku yèyè uvwa mumanye ne bivwa bifwanyine kukengela cintu cipite pa teoloji wetu wa patupu ewu, bivwa bifwanyine kukengela cintu cipite—cipite pa mukenji wònsò naka wetu wa patupu ewu, bivwa bifwanyine kukengela cintu cipite anu kuyiisha kwa Dìyì patupu eku, bwa kwelesha myoyi yabo ya mabwe ayi mitanta. Ùvwa mumanye ne bivwa bikengela EMU MMUDI MUKALENGE WAMBA bwa kutuma dilumbulwisha adi pa cisamba aci, pa nanku ùvwa mumanye aci paakapatukaye ne EMU MMUDI MUKALENGE WAMBA apu. Ne cyòcì aci civwa ng'EMU MMUDI MUKALENGE WAMBA. Kubenga Aci ku maditambishi, civwa ncilumbulwidi. Tudi tumona aci mu dituku dyetu edi kabidi, cyòcì aci. Tudi tumona aci mu dituku kana dyònsò. Kakwena cidì cishaale to anu cilumbulwidi paudi usambuka mukalu wa ngàsà.

³³ Mpindyewu, cimfwanyi aci kwaka, aci, nêmfwanyikijè Eliya ne ekeleeziya leelu, ekeleeziya wa leelu ewu. Kumpala menemene kwa cilumbulwidi, nkwakapetaye mukenji mwine ewu. Eliya, uvwa uleeja mpala, bu muvwaye mukubiibwe mu mubidi, cyakudya cyende cya mu mubidi aci, bwalu mvula kavwa mwa kuloka mpindyewu to, bilondeshile Dìyì dya Nzambi, munda mwa bidimu bisatu ne ngondo yisambombo, anyi too ne pavwa Eliya ne cya kumubiikila. "Cikondo cyònsò ciwamba wèwè aci, Eliya, ki ciikalà cyòcì aci." Ki bwa cinyi wakaya

tamakata mako too ne kudi mfumu, e kwambaye ne: “Nansha lumuma kalwakumataku to too ne pàngààlùbìikilà mèmè.” Aci’s ncingoma cijima cya—cya mwambuuyi’s, kî mmwômò anyi? Awu’s mmukenji mujima!

³⁴ Neku mpindyewu netufwanyikije aci ne mushipu wa nyuma wa leelu ewu ewu. Mpindyewu, tudi bônso bamanye, tudi bamanye bîmpè ne, kudi mushipu munene wa nyuma mu ditunga leelu ewu, mu ngaakwilu wa nyuma. Neku, nudi bamanye ne, aci ncyakadyanjilabo kwamba kudi baprofeta, kumpala menemene kwa Dilwa dya cyakabidi dya Kilisto kwenzekadi, ne: “Nekulwe ciyoole cya nzala mu ditunga, ne kacyakwikala anu cya dyâmpà nkaayaadi to, kadi cya kuumvwa Dîyi dya Nzambi.” Ne dituku diine adi’s mmpindyewu utudi twakulangana neenu ewu, “kuumvwa kwa Dîyi dilelela dya Nzambi.” Mpindyewu, mushipu wa mubidi ewu ncimfwanyi cya wa nyuma.

³⁵ Mpekaatu ne bupidya, kudi balongeshi baa mashimi ne beena cyena leelu mu ekeleeziya, byakafikisha mwaba awu ku dilumbulwisha divwa dilwa, dikaavwà diseemene edi. Neku bôbô bakaavwa beele Dîyi dya Nzambi ne muprofeta Wende nyima, baye ku ngaakwilu ya cyena leelu ya teoloji pa bidi bitangila Dîyi.

³⁶ Nudi numona apa ne, anu pa diine dîbà adi mpadi Nzambi ujuula cintu kampana. Bwalu, Yêyè, misangu yônso, Yêyè katu wenza cintu nansha cimwe to anu mwanji kucibuulwila bantu dyambedi, ne Yêyè utu misangu yônso ucibuulwila kudi basadidi Bende.

³⁷ Mpindyewu, kadi Eliya, mu ciine cikondo eci, uvwa ne kaaba kasokome kavva Nzambi mumulongolwele bwa kuyaye. Ki cintu citudi baswe kumona mpindyewu mene kumpala kwa twêtù kwenza mulongo wa babeedi. Eliya uvwa ne kaaba kasokome kalongolola kudi Nzambi Yêyè mwine. Mpindyewu, kî ng’ekeleeziya wâkamulongolwelakù to, kî mmfumu wâkamulongolwelakù to, kî nyêyè mwine wâkakalongolola to, kadi Nzambi ngwâkalongolola kaaba kasokome bwa Eliya kwikalaye udiishiibwamu dîbà dyônso mu cikondo cya mushipu aci, mùvwà cyakudya cyende cìlongolodiibwa ku dituku ne ku dituku. Kavva ne bwalu bwa kudikonka ne cìikalà mwa kwenzeka maalaba ncinyi anyi kudikonka ne cyakudya ciine ncijike anyi kî ncijike to. Nzambi wâkamba ne: “Ndi mutumine bikololo dîyi ne byôbi ki biikalà bikudiisha.” Cintu cilenga kaayipu’s we, cimfwanyi cya kaaba keetu kasokome mu Kilisto.

³⁸ Padi nsangilu wa buloba bujima ne byônso bìdì bipitakana leelu ewu ebi, bìdì byôbì byâmba ne: “Matuku a bishima akaadi mamane kupita.” Makole manene a Nzambi akaadi muumushiibwe mu maekleeziya. Mbimweke anu bu ne, bôbô biine, kabacyena kabidi ne cintu to anu “cyamu cidì cyenza

mutooyi ne byamu bidibo bakumakaja.” Tudi bamanye ne aci mbulelela. “Ne cimwenekelu cya difwana dya Nzambi, kadi biikàle bavila Bukole bwadi.”

³⁹ Ncintu anu cimwecimwe aci cidi Davidi mwenze, mu dinda emu, ne matempu a ngombe, museesuke ku Dîyì. Paakabaleejabo ne kubapabo Dîyì, kabaakaDiswa to; ki bwa cinyi, bakaavwa baseesukeKu.

⁴⁰ Ki cyàkenzà bantu aba mu matuku a Eliya, baseesuke ku Dîyì. Bavwa badyelela meeji ne bavwa ne Dîyì, kadi kabayi naaDi to. Pa nanku monaayi dîbà adi mu . . .

⁴¹ Mu cikondo civwaYe wamba kunyooka mwena bupidya, Yèyè wakasebeela mwena kwitabuuja njila. Cintu cimwecimwe aci ncidiYe wenza musangu wònsò. Mu matuku avwaYe wamba kubutula buloba ku mâyi awu, Wakenza njila wa dipandukila bwa Noa. Mu matuku avwaYe wamba kutukija Ejipitu mu mâyi awu, wakasebela njila wa dipandukila bwa cisamba Cyende bwa kusabukaci mbû. Mushindu mwine udi Nzambi usebela njila Wende’s we! Ne mwaba udi kawuyi njila nansha umwe awu, Yèyè ki Njila awu. Yèyè ki njila awu!

⁴² Mpindyewu tudi tufika ku dyumvwa ne tukaadi kumpala kwa . . .dimwe dya ku mèbà manene akaadi maalu malonda mamanyeku. Kacyena anu menemene ntafu munene ne missile wa ubalakana bikole, mwikàle ne mutu mwasaku awu to, bwa twètù kuumvwila bwôwà. Ekeleeziya ki yidi yikengela twètù kuumvwila bwôwà. Dîbà ditudi ne mwoyi edi ki didi dikengela twètù kutabaleela.

⁴³ Mpindyewu monaayi, kadi Nzambi wakenzela Eliya njila wa dipandukilaku. Ne Yèyè mmwenzele bânà Bende badi biitabuuja njila wa kupandukilabo ku cyôci aci mpindyewu, ciiji cikole ne maalu adi ne cya kulwa.

⁴⁴ Bwalu, Nzambi kî mmufwanyine kwikala mwakane pa kulumbulwisha bantu abu ne kubatumina dinyooka, ne kutukija Sodoma ne Gomola, ne kutukija Kaapenuma munkaci mwa mbû, ne kupiisha nkongo ayi, ne Sodoma ne Gomola, kadi kutulekela twètù twenza cintu cimwecimwe aci katuyi tunyookiibwa to. Twètù’s tudi menemene batwishiibwe bwa dilumbulwisha anu muvwabo paabo batwishiibwe bwa dilumbulwisha amu. Mpindyewu tudi tumona ne . . .

⁴⁵ Pààkajukà biine bintu ebi, mmwenenu wa cyena leelu wa dituku adi awu, Nzambi uvwa ujuula muntu mu diine dituku adi, anyi wakajuula muntu, nanku’s we, bwa kulwangana ne makole awu, kadi bôbò kabaakaswa kuciteeleja to. Baakadyambidila ne yèyè uvwa mupâle: “Ûvwa mujimije lungenyi. Ûvwa anu mukoleshi wa maalu wa kale, mukutakane mufumine mu cipeela, uvwa cisuku civwije mupâle mu mushindu kampanda.” Kadi, nansha nanku, yèyè uvwa ne Dîyi dya Mukalenge.

46 “Diyì kadyena diswa kwamba mudiDi dyamba amu to,” mudibo bamba leelu ewu. “Kaa, ee, Bible’s mmukanda wa maalu malonda.” Ngeela meeji ne nukaadi bamone cyôcì aci, cidibo bôbò bamba mpindyewu eci, ne: “Eva kaakadya cimuma cya pomme to, wàkadyà . . .” Civwa ncinyi apa? Ngeela meeji ne. . . “Civwa ncimuma cya apricot,” mukaadibo bamba mpindyewu. “Civwa ncimuma cya apricot.” Ne pashiishe, ne: “Môsà kaakasabwisha bânà mu Mbû Mukunze to. Civwa ncikutukutu cya malenge, kundekeelu kwa luseke lukwabo lwa mbû kwaka, ki kupicilaye mu mbû wa malenge.” Kadi mmunyi mwàkenzà mâyi, m-â-y-ì, menze bimanu nseke yônsò yibidi, mwakapicilabo bendela pa buloba bûme, dîbà adi? Kaa, lukutukutu naanyi we! Kadi, nudi numona’s, bidi bikengela dituku dya mushindu awu bwa kutuulwisha ciji cikole cya Nzambi pa bantu. Ki cidi cicyenza.

47 Badi bamba ne kakutu cintu paaci ne—ne ebi. . . Nansha bantu baa mu ekeleeziya biine kabeena biitabuuja bishima to. “Nênkupè ndola cinunu,” mudibo bambe, “ndeeje cishima. Ndeeeje cishima!” Ee, kî mbafwanyine kucimona to nansha kwenzeke bintu binunu dikumi kumpala kwabo. Mona’s, bôbò abu, kî mbafwanyineku kucimonaku to.

Wêwè udi wamba ne: “Aci kacyena mwa kwenzekaku to.” Kaa, to, kî nnanku to.

48 Musangu kampana Eliya uvwa usanganyiibwa ku Dotana, ne cilwilo cya beena Suuliya cilwe kunyungulukila cimenga, bwa kumukwatabo, bwalu bavwa bamanye ne mu yêyè ki muvwa bukole bwa— bwa ditunga adi busanganyiibwa, mu mwena lùmònò awu. Mona’s, mfumu. . . Umwe wa ku bantu abu ki uvwa mukambile mfumu wa Suuliya, ne: “Mona’s, udi mumanye’s, Eliya muprofeta, mwena Tiishiba, ngutu wambila mfumu wa Izaleela byûtù wêwè wamba mu cibambalu cyebe cisokome abi.”

49 Yêyè ne: “Nda kakwataayi mulumyana awu! Muntu awu’s ngudi utupangisha’s.” Ki cilwilo cya beena Suuliya cyônsò nkòòng kuyaci anu bîmpè bîmpè e kunyungulukilaci Dotana. Baakamunyungulukila eku ne eku.

50 Ki Gehazi, musadidi wa—wa muprofeta, kutabuluka, e kwamba ne: “Kaa, taatù wanyi, bilwilo’s mbitunyungulukile nseke yônsò mwaba ewu. Mbatunyungulukile anu menemene.”

51 Yêyè ne: “Mona’s, bàdì neetu twêtù mbapite bàdì naabo bôbò ku bûngi.” Nwamonu anyi?

Ki Gehazi kukenzakana, kwambaye ne: “Ncyèna mmona muntu nansha umwe to.”

52 Yêyè ne: “Mukalenge Nzambi, kangulaku nsongaalume wawa mèsù.” Ki mèsù ende kukangukawu, nenku tukuna twônsò tuvwa tûle tente ne Banjelo ne makalu a mvita bisanganyiibwa mu nyungulukilu mwônsò, Makole adi kaayi amweneka awu.

53 Eliya kupatukaye pambelu apu, ne Bible mmwambe ne: “Yêyè kubavwija bampofu.” Kupatukaye kuvwabo aku; bôbò bavwa bampofu kabayi bamumona yêyè to. Kupatukaye ne kwambaye ne: “Unudi nukeba ng’Eliya anyi?”

Awu ne: “Eyowa’s, yêyè awu’s ki utudi tukeba ewu.”

54 Yêyè ne: “Katuyaayi, mêmè nênnùleejè anu menemene mwaba udiye usanganyiibwa,” ki kubalombolaye too ne mu mwaba wa bababucikila, anu buludi too ne mwaba mene wakapatukila bilwilu kadi kubakwatabo.

55 Mpindyewu, Bible mmwambe ne: “Yêyè kubavwija bampofu.” Aci’s ncikose bwalu. Kadi bantu mbampofu baa mu nyuma leelu ewu mu mushindu wa ne, nansha mene Mukalenge Nzambi mutuuluke munkaci mwa bantu ne mwenze cintu kampanda, ne bintu byakalayaYe, kabeena anu mwa kuCimona to. Bôbò mbampofu mu nyuma; kabayi bamanye Nzambi, kabayi bamanye Bukole Bwende bunene to. Mpindyewu, tudi tumona ne baakenza aci mu matuku a Eliya, ne bacidi anu bacyenza leelu ewu. Nzambi ngudi ubavwija bampofu. Badi bamba leelu ewu, ne: “Kakutu bishima to, cintu bu cyôci aci kacituku to, byônsò ebi bidi ndisaluka.”

56 Kadi’s bàakamba cintu cimwecimwe aci bwa Eliya, bwalu paakambwibwaye ne Elisha kwangataye kaaba kende, nsongaalume, ukààvwa mushaale mutu dibàla, nsonga, ki bânà kupatuka e kubanga dimulonda, bamba ne: “Mukulumpe wa mutu dibàla wawa, bwa cinyi wabengi kubànda ne Eliya?” Nwamonu’s, kabavwaku nansha baCiitabuujja to anu kwine kwônsò aku, bantu, paanyima paa bintu bûngibi bìvwà byenjiibwe abi. Kadi muntu munene wa Nzambi ewu uvwa mutentemunyiibwe mubwele mu Dyulu mu dikalu dya kapyà, kadi bantu kabavwa anu baCiitabuujja to. Ki kutumabo bânà baabo balela benda balonda muntu ewu lubilu bamba ne: “Mukulumpe wa mutu dibàla wawa, bwa cinyi wabengi kubànda?” Nwamonu anyi? Ki dibà adi muprofeta kwelaye bânà abu mulawu, ki ours mukaji kushipaye makumi anaayi ne babidi baa kudibo.

57 Mpindyewu monaayi. Leelu ewu, anu mwakadibi musangu awu, badi basakidila dyumvwija dyabo bôbò ku Dìyì. Mpindyewu, piikalàbo baswe kwenza nanku, aci ncibatangile, kadi badi bakeba bwa kutwitabuujjaci. Bible mmwambe ne: “Dìyì dya Nzambi edi kadyena dya muntu wela didyumvwijila dya paa nkaayende to.” Nzambi udi uDyenzela Yêyè mwine dyumvwija. Nzambi udi ushindika Dìyì Dyende, nenku ki dyumvwija dyaDi ndyôdi adi. Anu mûnkaadi mwambambe misangu ne misangu, Yêyè wàkamba ku cibangidilu ne: “Bukênkè bwikalèku,” ne bukênkè bwakiikalaku. Aci kaciyena cikengela dyumvwija to; cyakenzeka. Yêyè kwamba ne: “Virgo neimite difu,” pende kwimita. Wàkamba ne Yêyè “neapongolole

Nyuma Wende,” Wàkapòngolola. Ne Wàkamba, “mu matuku a ndekeelu,” bintu bivwaYe mwa kwenza, s’ki kubyenzaYe eku! Kacyena cikengela dyumvwija kampanda to; Nzambi udi munkadi mwa kuDyenzela Yèyè mwine dyumvwija. Nansha cidid muntu mukutakane wamba, aci kacyena ciimanyikaku Nzambi to nansha kakese.

⁵⁸ Pavwa Yesu pa buloba, Ùvwa ne bupidya bwa dilwangana naabu mvita anu bungi bumwebumwe ne butudi naabu leelu ewu ebu, ne pàmwāpa bupite ebu. Kadi kabwakaMwimanyikaku to; Wàkatùngunuka anu ne kwenza ne kukumbaja mudimu Wende, ne Nzambi mwikàle ushindika cyònsò civwaYe wenza. Yèyè wàkamba ne: “Ncyèna Mèmè nkaayaanyi to. Taatù Wanyi ne Mèmè tudi umwe; Yèyè mmusòmbèle munda Mwanyi. Kì m’Mèmè udi wenza byenzedi to, n’Taatù udi musòmbèle munda Mwanyi. Nenku piikalàbi ne Mèmè ncyèna ngenza byenzedi Byende to, dîbà adi kanuNgiitabuujì to; kadi piikalàbi ne Ndi ngenza byenzedi ne nansha nanku kanuyi mwa kungiitabuujà Mèmè to, itabuujaaayi byenzedi.” Nwamonu anyi? Mu ngaakwilu mukwabo, bôbò bavwa... “Kenketaayi Mifundu,” mwàkambàYe, “bwalu ki mwômò amu munudi nudyelela meeji ne nudi ne Mwoyi wa Cyendelelele, mpa kumanya kwa Mifundu. Kadi Mifundu ayi, Yôyi miine, s’ki yidi yiMfidila bujaadiki.” Amen! Diyì kaayi’s we! “Yôyi ayi, Mifundu ayi, s’ki yidi yinwambila ne Mèmè ndi Nganyi,” mwàkambà Yesu.

⁵⁹ Ne Mifundu’s ki yidi yinwambila dîbà ditudi ne mwoyi. Ne bintu binudi numona byenjiibwa, s’n’Nzambi Yèyè mwine munkaci mwa bantu Bende. Kakwena cidid mwa kubiiisha bafwe to pa kuumusha Nzambi. Kakwena cidid mwa kwenza bintu bidìYe munkaci mwa kwenza mpindyewu ebi to pa kuumusha Yèyè. Bwalu Bible mmwambe ne: “Yèyè udi umwèumwè awu makelele, leelu, too ne kashidi.”

⁶⁰ Mpindyewu tudi tumona mmwenenu wa cyena leelu wa bantu awu, dîbà adi ne: “Kaa, matuku awu akaadi mapite, kakwena cintu paaci ne mbishima to. Bantu mbadi bangacike ne masaluka abu.”

⁶¹ Teelejaayi mudi Eliya, muprofeta awu, wela mbila bwa kubalwisha bôbò ne beena teoloji baabo. Monaayi, monaayi ne, wakaakula byenze bu ne yèyè uvwa Nzambi Yèyè mwine. Eliya wakaakula byenze bu ne yèyè uvwa Nzambi Yèyè mwine ne: “Lumuma kalwakumataku mu dyulu to too ne pândi mèmè ndubiikila.” Amen! Eyowa’s, mukalenge. Muprofeta awu ukaavwa mwenze mukùngùlù mule be mu Bwikadi bwa Nzambi!

⁶² Baprofeta baa Dipungila Dikulukulu abu, anyi baa dîbà kana dyònsò, padibo bàsòmba mu Bwikadi bwa Nzambi too ne padibo bashaala Diyì, Mukenji wabo udi Diyì Dyòdi diine. Nenku, vulukaayi ne, yèyè wàkamba ne: “EMU MMUDI

MUKALENGE WAMBA.” Nénku pavwa bantu abu bapeta mikenji ayi kudi Nzambi, ne bashaala batukine bikole mu mushindu wa ne ngeelelu wa meeji wabo bôbò biine... Ncifwanyine kwikala cibengangane ne wabo ngeelelu wa meeji, mu mushindu wa bafwanyine kwikala kabayi mwa—mwa kucimonaku mu mushindu udi ukengediibwa to. Kadi bavwa bamba Dîyì dya Nzambi ne: “EMU MMUDI MUKALENGE WAMBA.”

⁶³ “Kakwakwikalaku mvula to too ne pândi mêmè mmubiikila.” Kaa, ndîyì kaayi adi’s we! Yêyè ukaavwa mu bwikadi bwa Nzambi ne mushindikiibwe anu menemene’s. Nénku, vulukaayi ne, aci cidid kabidi cilonda Aмоса 3.7 ne: “Mukalenge Nzambi kaakwenza cintu nansha cimwe to padiye kayi mwanji kucibuulwila dyambedi basadidi Bende baprofeta.” Kwambaye ne: “Kakwakulokaku mvula to!” Wakanji. . .

⁶⁴ Kumusekabo, beela meeji ne ùvwa mupâle: “Mukoleshi wa maalú awu!” Kadi, nwamonu’s, yêyè’s uvwa ne EMU MMUDI MUKALENGE WAMBA ne mvula kavwa mwa kuloka. Nénku, Nzambi, kumpala kwa yêyè kwenza aci, Yêyè ukaavwa mucibuulwile Eliya musadidi Wende. Ne yêyè uvwa muprofeta mushindika, mujaadika, mu mushindu wa ne bivwa bikengela bantu kwikalabo banyingalale. Kadi, pamutu paa aci, baakamuseka’s, bamba ne: “Kaa, s’tudi ne mvula wabûngì be! Biinà bya kulamiina mâyi’s mbyûle tente. Misulu’s ki kupwekayi anu bilenga eku.”

⁶⁵ Bible mmwambe ne: “Kakuvwa nansha lumuma to munda mwa bidimu bisatu ne ngondo yisambombo.” Tusulu tukese twônsò ne mâyi byakuuma, myaba yônsò. Aci kacivwa mmuntu awu to, civwa n’Nzambi wakwila mu muntu awu. Civwa “Mêmè” uvwaku awu. Tutu misangu yônsò bamanye. Pa nanku yêyè. . .

⁶⁶ Tudi tujandula ne padi muntu ulwa, mutuma kudi Nzambi, mulongolola kudi Nzambi, mwikàle ne EMU MMUDI MUKALENGE WAMBA mulelela, mukenji ne musanjeela bidi umwe ne cintu cimwe. Bwalu yêyè mmutumiibwe bwa kuleeja mpala wa EMU MMUDI MUKALENGE WAMBA, ku Dîyì ne ku Dîyì, díbà adi yêyè ne mukenji wende bidi cintu cimwe.

⁶⁷ Muntu wa cyena mangumba mwikàle mu bukubi bwa cyena mangumba, yêyè ne ekeleeziya awo bidi “umwe.” Mwena teoloji mwinshi mwa bukookeshi bwa teoloji, mufwimbakaja kudi dingumba kampanda, yêyè ne wende mukenji bidi umwe; ekeleeziya wa teoloji, mwena teoloji. Mbikumbanangane.

⁶⁸ Nénku padi muntu ulwa ne EMU MMUDI MUKALENGE WAMBA, yêyè ne Mukenji bidi umwe. Nénku pàakalwà Eliya ne EMU MMUDI MUKALENGE WAMBA, yêyè ne mukenji wende byakalwa umwe. Anu muvwa Yesu, paakalwaYe, Ùvwa Dîyì, Yone Munsantu 1. Nanku Dîyì dya Nzambi ne musanjeela wa cikondo bivwa cintu cimwe, díbà dyônsò. Neya bushuwa.

69 Yesu uvwa Dîyi divwa dyambiibwe mu ciprofeta. Yêyè uvwa cikaavwa baprofeta bambe ne necyenzeke: “Virgo neimite difu ne nealele Mwânà ewu.” Anu kale ku cibangidilu kwaka, Nzambi ukaavwa mubâmbile wamba ne: “Dimiinu dya mukaji nedizaaze mutu wa nyoka, ne yêyè neamuzaaze cikankanya.” Biprofeta byônsò ebi bikaavwa bifidiibwe. Davidi wela lubila, baprofeta bakwabo bônsò munda mwa bikondo, baakula bwa bwalu Bwende. Yêyè nguvwa Dîyi adi dimweneshiibwe! Aleluuyah!

70 Mpindyewu nudi numona kûndi ngiipacila bwa kuya kafika anyi? Ndi mwakule neenu bitooke tòò mu dinda emu. Kanwenaayiku numona bukookeshi bwa Nzambi udi ne mwoyi mu Ekeleeziya udi ne mwoyi, Mukaji musela anyi? Babeedi badi bondopiibwa, bafwe badi babiishiibwa, bikalaba bidi byendela kuulu, bampofo badi bamona, Evanjeeliyo udi upatuka mu bukole Bwende, bwalu Mukenji ne musanjeela bidi cintu cimwe. Dîyi didi munda mwa Ekeleeziya, mu muntu awu.

71 Dîyi dya Nzambi divwa munda mwa Eliya pavwaye wenda uya kuntwaku ne EMU MMUDI MUKALENGE WAMBA apu, wamba ne: “Mvula kaakulokaku to.” Awu kavwa ng’Eliya to; ùvwa n’Nzambi munda mwa Eliya.

72 Nkaadi mwambambe misangu yâbûngî, muvwa inâbânzà wa beena Science Chrétienne mungambile musangu kampanda. Nkaadi mucyâmbâambe misangu yâbûngî pa bwalu abu. Ûvwa wamba ne: “Mukalenge Branham, wêwè udi utamba kutwa Yesu makumbu be.”

Mêmè ne: “Ndi ntekemena ne aci ki cintu cimwepele cidi cikengela bwa mêmè kulumbulwila’s.”

Ki yêyè ne: “Wêwè udi ukeba kuMuvwija Nzambi’s.”

Mêmè ne: “Yêyè’s uvwa Nzambi.”

73 Yêyè ne: “Kaa, Yêyè uvwa muprofeta, Ûvwa muntu mwîmpè, kadi Kavwa Nzambi to.”

74 Ki mêmè ne: “Ee, ndeejaaku Mufundu umwepele udi wamba ne Yêyè kavwa Nzambi.”

75 Yêyè ne: “Mu Mukanda wa Yone Munsantu, mbambe ne Yêyè ‘wakadila mwadi’ paakayaYe ku lukita lwa Lazârô.”

76 “Ee,” mêmè ne, “cya bushuwa, Yêyè wakadila mwadi. Yêyè uvwa eku muntu eku Nzambi. Ûvwa muntu, udila mwadi; kadi bivwa bikengela kwikalàYe Nzambi bwa kubiisha bafwe.” Cya bushuwa. Mêmè ne: “Ûvwa muntu, umvwa nzala; kadi Ûvwa Nzambi mwikalà udiisha bantu binunu bitaanu, ne tusukwita tubidi ne mishipa yitaanu.” Ncya bushuwa’s. “Ûvwa muntu, ulaala tulu mundekeelu mwa bwâtù; kadi civwa n’Nzambi munda Mwende uvwa mwa kubatamija mâyi.” Bwa cinyi? Yêyè ne Mukenji Wende bivwa cintu cimwe.

77 Yèyè wàkamba ne: “Mémè ne Taatù Wanyi tudi umwe. Taatù Wanyi mmusòmbèle munda Mwanyi.” Úvwa kaabujima kaa Bunzambi mu ciikadilu cya mubidi.

78 Ngeela meeji ne bivwa bya bikoka ntema bikole dituku dikwabo, pâmvwà ntwala *Bikondo Mwandamutekètè Byà Èkèleeziyà*. Bangabanga, ncivwa—ncivwa mwa kufika ku dyumvwa cintu cya ne Yesu uvwa mwimane mwaba awu ne ayi. . . ne nsuki mitooke ayi ku mutu Kwende mushindu awu, bambe ne: “Nsuki Yende yivwa mitooke bu myòsà ya mukooko.” Ncivwa mwa kufika ku dyumvwa muvwa muntu wa bidimu makumi asatu ne bisatu mwikàle ne nsuki mitooke bu nêjè to.

79 Mémè kubiikila mwena teoloji mwîmpè, mwena teoloji wa cyena Mpenta, mulunda mwîmpè munanga. Ee, úvwa m’Mwaneetu Jack Moore. Útu muntu wa meeji matwe, wa lungenyi. Kwambaye ne: “Mwaneetu Branham, awu’s uvwa n’Yesu mutumbishiibwe. Awu mmwenekelu uvwaYe nende paanyima paa Yèyè mumane kutumbishiibwa.” To, ncivwaku mwa kwitabuuja aci to. To.

Mémè—mémè—mémè kwamba ne: “Ee, Mwaneetu Moore, twasakidila’s.”

80 Mémè kubwela mu cibambalu mwamwa e kubanga kwakula ne Nzambi. Mémè kukenketa mu mukanda wanyi wa myaba yidi myaku bwa mémè kwalukila Nende mu Danye, mwaba udibo bambe ne: “Ki kulwaye kudi Mukulumpile Matuku Wa nsuki mitooke bu myòsà ya mukooko awu.” Mémè ne: “Mukalenge, ndi—ndi—ndi mupange cya dyamba’s, kadi paanyi’s nyewu ndi mwambule bujitu.” Mpindyewu, aci civwa nkumpala kwa mwandamuteket-. . . ne nwavulukaayi ne, nkumpala kwa Bitampi Mwandamutekete kukangudiibwabi, bu cidimu cimwe anyi bipite apu, kumpala. Mvwa nsambila mwaba awu ne: “Mukalenge, civwa ncinyi?”

81 Ki mémè kutangila, kumpala kwanyi aku, kuvwa kwimane muntu mwikàle nzuji, muvwa kafulu kaa nsuki mitooke. Banzuji baa bikondo bya kale bavwa ne ciibidilu cya kuvwala kafulu kaa nsuki mitooke bwa kuleeja ne úvwa mukookeshi wa kumutu kwa bônso.

82 Nunku pâmmwènè Yesu ne kafulu kaa nsuki mitooke aku, mémè kwamba ne cidi anu cishindika bulelela butudi bamanye, bwa ne Yèyè ki Mukookeshi Wa kumutu kwa bônso. Nzambi wakafila bujaadiki bwa cintu cimwecimwe aci pa Mukuna wa Dikudimuka dya mpala, wamba ne: “Ewu ki Mwan’Aanyi Munanga, muteelejaayi Yèyè, Mukookeshi Wa kumutu kwa bônso!”

83 Pashiishe kwaka naka ku cibangidilu cya Bitampi Mwandamutekete, pààkapwekà Banjelo mwandamutekete abu mu mmwenekelu awu wa cipaapu cya musaka, kwimanabo mwaba awu ne kungambilabo bwa mémè kwalukila apa bwa

kwakula pa Bitampi Mwandamutekete abi, ne Yèyè uvwa mwa kwikala naanyi, Ùvwa mwa kundeeja civwabi, bintu bivwa bijimine. Mvwa misangu yònsò ndyambidila anu ne civwa citwà citampi paanyima paa Mukanda ne ncifwanyine kwikala cintu kampanda civwa kaciya cifunda mu Mukanda, kadi kulwa kumwenekabi ne cyakamanyika ne Yèyè kèna mwa kwenza aci to. Kí ncintu cidì cifunda mu Mukanda to. . . Ncintu kampanda civwa cisokoka mu Mukanda. “Bwalu ewu yònsò wadidinga kuKuumushila Dìyì dimwe anyi kuKusakidila dìyì dimwe. . .” Pa nanku mbwalu busokoka buvwa anu busanganyibwa mu Mukanda mu bikondo mwandamutekete bya ekeleeziya ebi. Cyònsò cya ku byòbì cyakapatula bwalu busokoka kampanda—kampanda, byònsò bidi bitangila dibatiiza dya mu màyì ne bikwabo bintu ebi bivwabo baatwa mu nsampu baatwa mu kaleji kwine kwònsò aku abi.

⁸⁴ Pashiishe paakamana cyòcì aci kubànda, nzubu minene ya dijoojela kuumukila anu ku Californie, too ne kwaka ku Mexique, kuulu kwa Tucson kwaka, myaba yònsò, baCikwata fòtò. Civwa cya kaciya cyumvwika to pa kucimona. Mwaneetu Fred Sothmann wawa, udi musòmbè lwà paanyima pààpa wawa, ne mèmè ne Mwaneetu Gene Norman, tuvwa biimane anu mwaba awu pààkabàndàCi apu. Kukwatabo fòtò, kabeena anu banji kumanya ne ncinyi ciine aci to. Mwaba ewu anu abidi adi panshi apa aa, bantu bònsò bamba ne: “Tangilaayi apa. Eci’s ncimweke anu bu *cikampanda*, ne mapwapwa a Banjelo abu awu, mushindu udiwu madikonye munda amu.”

⁸⁵ Dituku dikwabo, mmusendamija anu ku dyabalume nunku, ntangila, ki Yesu Kilisto nyawu anu mùtù Hofmann muMuzole menemene amu. Civwa ciimane mwaba awu cyase kafulu kaa nsuki mitooke, cikudimuke citangile panshi pa buloba, cileeja ne Yèyè ki Mukookeshi Wa kumutu kwa bònsò. Maulu abwamba, Bible ubwamba, Mukenji ubwamba, byònsò anu mushindu umweumwe awu. Mukookeshi Wa kumutu kwa bònsò, mwase kafulu kaa nsuki mitooke; nudi numona mwedi Wende mufiike lwà kwinsi. Bààbùngì baa kunudi bakaadi bamone fòtò awu. Tudi nende mundekeelu mwamwa. Numusendamijaayi anu ku dyabalume aku, kasekeseke, numutangile. S’ki Yèyè awu’s, anu menemene muvwaci, byòbì ne Yèyè nguvwabo bakwate fòtò. Bòbò badi bacitangidila mu ditumba dibi. Bikengela nucitangidile mu ditumba dimpè. Nenku anu Mukalenge Nzambi ngudi mwa kusokolola ne ditumba didi dimpè ndyèpi. Numusendamijaayi ku dyabalume dyenu aku kadi nucitangile. Ki Yèyè awu’s, anu menemene, mukwaciibwe fòtò muulu mwamwa.

⁸⁶ Musangu wa nzànzànzà wùngààkaMumònàku, Ùvwa mufwanangane ne *Mutù wà*. . . Hofmann. Kacya ncivwaku mwanji kumona aci kwònsò aku to. Kadi mu tabernacle wa Billy Sunday, paakapita bidimu, mèmè kucimona. Mwanyi mu

nzubu ncutuku mupange kwikala ne cimwe cya ku bimfwanyi abi to kubangila anu piine apu.

⁸⁷ Pashiishe, apa mu maulu, cyamba ne Nzambi mwine ũngààkamònà mu cikeena-kumona pambelu apa awu, mucikàle anu mwànà mukese pambelu apa mwaba udi nzubu wa tulaasa usanganyibwa ewu, Ûvwa mufwanangane ne cyòcì aci. Nenku apa mu Maulu, bidimu makumi asatu ne bisatu bimane kupita, bacyamba, ne mbulelela. Mmwenekelu awu ki udiYe nende; kaciyi cintu kampanda cya kaciyi cyumvwika cya mmwenenu wa muntu kampanda nansha.

⁸⁸ Bu mudi mu Vatican, badi ne Kilisto ka—ka—kampanda udibo bazole kuntwaku, mwikàle ne kaamwedi kakese katooke kenze kajengu anyi kaamwedi kaa kajengu kanyungulukile cibanga Cyende, kaa bule bu bwa centimètre umwe ne ndambu, kanyunguluke lwà kumutu kwa mukana Mwende eku mushindu *ewu*, kadi kubiikila ciine aci ne n’Kilisto.

⁸⁹ Aci nyawu cyãm̀v̀lwiji muzodi mukwabo wa beena Ngelika ũngààkamònà musangu kampanda mu katedrale kaa kale, uleeja civwa mmwenekelu uvwa nende Adama ne Eva; bavwa bafwanangane ne nyama anyi cintu kampanda. Aci ncidi meeji a musunya mwa kumona bwa cintu kampanda cya nyuma. Mèmè ndi ngeela meeji ne Adama uvwa muntu uvwa mutambe kwikala mulenga kumona ukaadiku ne mwoyi, ne Eva uvwa mukaji mutambe kupwangana mu mushindu wònsò.

⁹⁰ Mpindyewu meeji a musunya adi avungakaja Cintu aci mu mmwenenu yabo bòbò, d̀b̀a adi Nzambi udi utuulula ne uvungulula Cintu aci ku Bukole Bwende. Ki cyòcì aci menemene cyàkenzekà mwaba ewu mu matuku a Aakaba.

⁹¹ Mpindyewu, tudi tujandula ne Eliya uvwa mwa kwamba nanku bwalu Mukenji wa d̀b̀a adi ne D̀ỳi dya Nzambi, anyi, musanjeela, Mukenji—Mukenji, ne D̀ỳi, bivwa cintu anu cimwe menemene. Muprofeta, D̀ỳi, Mukenji; musanjeela, Mukenji, ne Mukenji, bivwa cintu cimwe. Yesu wàkamba ne: “P̀ikalàb̀i ne Ncyèna ngenza byenzedi byakafundiibwa Bwanyi Mèmè, d̀b̀a adi kanuNgiitabuuji to.” Aci’s ncimpè. Muntu kana yònsò ewu ne mukenji wende badi umwe.

⁹² Ki bwa cinyi leelu ewu kabeena biitabuuja dyanza dya byenzedi bya Nzambi to, mbwalu kabeena biitaba Mukenji wa Nzambi to. Kabeena biitabuuja Mukenji to.

⁹³ Kadi aba badi biitabuuja d̀b̀a dya Nzambi ditudi ne mwoyi edi, bintu ebi n’Cyakudya cisokoka. Anji elaayi meeji, Nzambi mmuCisokoke mu mushindu wa ne bòbò badi baCitangila buludi kadi kabayi baCimonaku to. Mmushindu umweumwe uvwa Eliya mufomije cilwilu cya beena Suuliya awu. Mmushindu umweumwe udi Nzambi ufofomija mwena bupidya bwa kayi umona Cyakudya cilelela cya mwànà to, mwena kwitabuuja.

⁹⁴ Cyakabiikidilabo Noa ne, “mukoleshi wa maalu” aci, mwikàle wibaka bwàtù, mèsù ende ngavwa kacya anu makangula ku Dîyi ne mulayi bya Nzambi. Cintu mene civwabo babiikila ne ndikolesha dya maalu aci, cyakasungila Noa ne famiye wende. Nwamonu’s, cintu anu cimwecimwe aci. Cintu cidi bantu baseka aci, ki cintu citudi twètù tusambidila. Cintu cidi bantu babiikila ne “dipaala” aci, twètù tudi tucibiikila ne “Cinene!” Cidi baa pa buloba babiikila ne “cinene” aci, Nzambi udi ucibiikila ne “dikutakana.” Kadi cidi baa pa buloba babiikila ne “dikutakana” aci, Nzambi udi ucibiikila ne “Cinene!” Cidi menemene anu dipangakana adi didi pankaci paa Bulelela ne mashimi. Yesu Kilisto udi umwèumwè awu makeelela, leelu, too ne kashidi.

⁹⁵ Vulukaayi ne, yèyè wàkabwela mu kaaba kende kasokome ku ndongamu wa Nzambi, ku dibiikila dya Nzambi, ne ku Diyì dya Nzambi. Eliya wakabwela mu kaaba kende kasokome ku didyanjila-kumanya, ndongamu, dya Nzambi, ne dibiikila mu nsòmbelu wende, ne bilondeshile Dîyi. Pìikalàbi ne kî mmushindu awu utudi twètù babwele, ncyèna mumanye ní twàfikakù bishi’s.

⁹⁶ Nenku monaayi, kumpala kwa mushipu kubangawu, Eliya wakabwela mu kaaba kasokome aka bwa kushaala kwende ne mwoyi. Cimfwanyi cya menemene cya kumpala kwa dilumbulwisha kudikumadi pa buloba, Ekeleeziya ukaadi mumane kubiikidiibwa bwa kupatuka, Mukaji-musela mumana kusungula, kadi mwikàle anu mwindile cyanaana kumpala kwa dilumbulwisha kudikumadi. Mumane kwikala mwindile, ùdya Cyakudya cya Nzambi, usankila mabenesha a Nzambi. Muntu wetu yònsò wa maci ne mèsù ewu mmumanye ne tudi batangile buludi, tudi menemene anu mu dîbà dya dilumbulwisha.

⁹⁷ Tangilaayi! Mwaneetu Banks, bààbùngì baa kunudi nwènù bantu balume badi mwab’ewu diloolo edi, bavwa biimane kuntu kwaka pa mu mukuna apu mu dinda adi.

⁹⁸ Nenku ndi muswe kwakula pa bidi bitangila mukuna awu, mu dinda dya dyalumingu dilwalwà edi, bu Mukalenge mwa kwanyisha. Ndi mupete dibuulula dinene, cintu kampana cya disakidila cîndì mpanga mushindu wa kubenga kwamba diloolo edi. Kadi ndi ne . . . Nwamonu anyi? Ne bidi anu ku musangu ne ku musangu, dîbà dyònsò, cintu cimwe cyenzeka paanyima paa cikwabo. Nwamonu anyi? Kacyakulekelaku kwenzeka to, bwalu civwa ng’EMU MMUDI MUKALENGE WAMBA.

⁹⁹ Muntu ne muntu wa kunudi mwab’ewu, binunu bivudija ku binunu pa mikaba ya mèyi, nukaadi bangumvwe ngiimana ngamba ne: “EMU MMUDI MUKALENGE WAMBA, nebiikalè *nunku ne nunku.*” Kabidi nansha bibejibeji ne bikandakanda bidi ne cya kwamba ne ki mudibi. Bòbò kî mbamanye ne biine byònsò abi mbinganyi to, kadi mbacimone. Kî mbamanye ne

ncinyi to, kadi mbacimone, cyenza ne Dìyì diikàle anu bulelela menemene.

¹⁰⁰ Tuvwa biimane kwinshi ku musulu eku, Mwanjelo wa Mukalenge awu kupwekaYe diine dituku adi, kukaadi bidimu makumi asatu ne bisatu, anyi muvwa mmu cidimu cya 1933, kupweka kadi kwakula wamba bintu byàkambàYe abi. Mpatuka mu mâyì nunku, bantu bààbúngì biimane ku mwelelu aku, bamba ne: “Aci civwa ciswa kwamba cinyi, Billy?”

¹⁰¹ Mêmè ne: “Aci kacivwa bwanyi mêmè to; civwa mbwenu nwènù. Mêmè ndi mwitabuuje, nwènù ki badi kabayi biitabuuje to.” Ki mêmè kutungunuka anu ne kuya.

¹⁰² Piine apu mpaasata uvwa ungambila, wamba ne: “Udi uswa kwamba ne wêwè ewu, ne kalaasa kaa mwandamutekete kaudi mulonge aku, newikale mwa kuya pa buloba bujima bwa kasambidila bakookeshi ne balombodi baa makookeshi maalabale ne bamfumu baa matunga ne bikwabo? Kabidi, kakaa,” yêyè ne, “uCipwe mwoyi!”

¹⁰³ Ncivwaku mwa kuCipwaku mwoyi to, Civwa cifunda pa mwoyi wanyi ne maleeta matonkona. Mpindyewu mwab’ewu, paanyima paa bidimu makumi asatu ne bisatu bimane kupita, byònsò byàkambàYe mbyenzeke anu menemene mwàkambàYe ne Neàbyènzè amu. Yêyè n’Nzambi ne kèna mwa kupangilaku to. Ûtu misangu yònsò mushaale anu mukwate ku Dìyì Dyende. Yêyè . . . KanùCyédìku mpatà to.

¹⁰⁴ Mpindyewu, monaayi, wàkabwelamu ku ndongamu wa Nzambi (didyanjila-kumanya), ku dibiikila dya Nzambi, ne ku Dìyì dya Nzambi, ne wàkabwelamu kumpala kwa mushipu kubangawu.

Mpindyewu, tudi bamanye ne dilumbulwisha dikaadi pabwìpì ne kudikuma.

¹⁰⁵ Biimane pa kakuna aku diine dituku adi, Mwaneetu Banks Wood udi mwimane apa ewu, tuvwa twenda tubànda kakuna aku. Pàmwăpa ndi nciteela cyakabidi, bwa ciibake diitabuuja dyenu bwa mulongo wa babeedi udi pabwìpì ne kwenzeka mu tusunsa dikumi, dikumi ne tutaanu tudi tulonda etu. Mwya ngenda nya mwikàle anu kumpala kwa Mwaneetu Banks. Yêyè uvwa . . . Ngeela meeji ne mpavwaye mushiyangane ne Mwaneetu wa bakaji Ruby pavwaye usaama apu. Nenu ku muvwaye wenda undonda muunyima, mêmè kumona mpala wende, mukunze. Mêmè kutangila paanyima. Mêmè kwela meeji ne nkakuna aku kavwa kafwanyine kwikala kamukolele ndambu bwa kukashimuna, pa nanku mêmè kwenza bu wâtekèshì. Anu mu bipeela abi, kubànda tukuna mushindu *ewu*, anu menemene mwaba uvwa Banjelo baa Mukalenge bamwenekele awu. Tukaavwa anu twenda tuya batangilepu diine dîbà adi, mwaba uvwaBo bamwenekele kukaavwa ndambu wa ngondo kumpala kwa ciine aci awu.

106 Nénku pâmvwà ngenda mbànda kakuna aku, Nyuma wa Nzambi. . .Pângààkakùdimukà, kutangila ku lusongo lwa mukuna, Yèyè kwamba ne: “Angula dibwe dyadya, umwambile ne: ‘EMU MMUDI MUKALENGE WAMBA, neumone Butumbi bwa Nzambi mu mèbà makese adi alonda aa.’”

107 Mèmè kwangula paanyi anu dibwe adi cyanaana, kwamba ne: “Mwaneetu Banks, ncyèna mumanye ne mbwa cinyi to,” mèmè kudikupa muulu mu lupepele, e kwamba ne: “EMU MMUDI MUKALENGE WAMBA, neumone Butumbi bwa Nzambi.”

Yèyè ne: “Civwa ciswa kwamba ne n’Ruby anyi?”

108 Mèmè ne: “To, ncyèna ngeela meeji ne civwa ne bwalu bwa bukutangila wèwè, Banks anyi Ruby to, nì ngwèwè nì nyèyè. Ndi ngeela paanyi anu meeji ne Cyòcì ncyambe anu cyanaana ne: ‘EMU MMUDI MUKALENGE WAMBA, cintu kampanda necyenzeke.’”

109 Nénku paakacyabu mu dinda patuvwa biimane mwaba awu, bantu balume bààbùngì, ncyèna mumanye ne mbanganyi ku badi basòmbe apa mpindyewu aba to, tuvwa dikumi ne babidi anyi dikumi ne banaayi, dikumi ne bataanu bavwa basòmbe mwaba awu. Dyakamwe, mwambi mukwabo kulwaye kùmvwà aku ne kwambaye ne: “Mwaneetu Branham,” yèyè ne, “dîna dyanyi n’*Kampanda*.” Yèyè ne: “Mvwaku umwe wa ku bakutuudidi baa mfranga mu Californie.”

110 Mèmè ne: “Ndi ne disanka dya kutwilanganaku neebe, mukalenge.” Douglas McHughes. Yèyè ne: “Ndi. . .” Mèmè ne: “Ndi ne disanka dya kutwilanganaku neebe.” Mèmè kumulabula ku cyanza.

111 Yèyè ne: “Ee, mpindyewu, ndi muswe kukwelaku lukonko.” Yèyè ne. . .Roy Roberson, mulubuludi wa mwaba ewu; Mwaneetu Wood, Terry ne Billy, ne, kaa, Mwaneetu McAnally, ne ncyèna mumanye bônso bavwa biimane mwaba awu to. Ki mèmè. . . Yèyè ne: “Ndi muswe nkukonkeku cintu kampanda.” Yèyè ne: “Nzambi utuku ukupeesha bikeena-kumona paudi mupatuke mushindu ewu anyi?”

112 Mèmè ne: “Eyowa, mwaneetu, kadi ntu mpatuka ndwa muneemu emu mbwa kubyepukaku mu mushindu kampanda, bwa kwikisha.”

Ki mèmè kukenzakana mushindu ewu, ne mèmè kumona ngangabuka kampanda wa katanku mwikàle umutangila, wamba ne: “Révérend McHughes, edi disunsuma dîdì mu dîsù dyebe edi nedishipe dîsù edi matuku adi panshi aa. Ndi mukwondope kukaadi bidimu bibidi bijima, kadi nciyiku mwa kwenza cintu nansha cimwe bwa dyòdì edi to.”

Ki mèmè kukudimukila kuvwaye aku. Mèmè ne: “Cyûdì mungeelele lukonko alu, ngangabuka webe mmukwambile,

dituku dikwabo ne: ‘Disunsuma didi mu dîsù dyebe amu.’” Tukaavwa dîbà nkankala, bu dîbà dikumi ne dimwe nanku awu, ne yêyè uvwa mwase binete bya muunya. Mémè ne: “Kabingila; kwêna mwase binete abi ne mbwa muunya to, mbwa dîsù dyebe adi. Mmukwambile ne ‘neujimije dîsù adi.’”

Ki kubangaye kudila, kwambaye ne: “Aci ncyà bushuwa.”

¹¹³ Mémè kukudimuka bwa kubanga cyakabidi kwenda kunyunguluka, mwikàle ne cikasù mu cyanza. Ki mémè kutangila; e kumumona mwimane mwaba awu muntangile, mèsù ende menze anu bu avwa abalakana. Mémè kwamba ne: “Kadi EMU MMUDI MUKALENGE WAMBA, kwakujimijaku dîsù adi to.” Tudi batwe nende buluwa mu muvù wa mabeji apoopoka mushaale ewu, yêyè udi mwa kumona bîmpè kumpita ne mémè ne kupita nî nganyi nî nganyi wa mu musumba awu. Kacya kavwaku. . .

¹¹⁴ Ki mémè kumona inábànzà mushindame upwekesha lushesheete lwende kadi ùbàndisha luseke lwa jipè wende. Wamba ne: “Mwanaanyi, wèwè mumone Mwaneetu Branham, umwambile ansambidileku bwa makàsà aanyi aa.” Ki mémè kupwekesha mèsù mwaba awu, ne tukese. . . byenze bu tuubyûjà tûle pa makàsà ende apu, tunyunguluke eku ne eku.

¹¹⁵ Mémè kwamba ne: “Mamwèbè nyinábànzà ukààdi ne mvyà ku mutu. ‘Mwanaanyi,’ udi umona’s. Mmukwambile kumpala kwa wèwè kuumuka ne, wèwè mumone, ungambile bwa mémè kumusambidila bwa makàsà ende. Ûdi ne tuubyûjà tukese tukese, tuntu bu nanku, tumûle pa makàsà pônsò apu.” Yêyè kadi kwamba kuumunyina’s.

Yêyè ne: “Aci mbulelela.”

Mémè kwamba ne: “Umwambile kalubakanyi to. Nebîikalè bîmpè.”

¹¹⁶ Mémè kubanga kwenda nyunguluka. Dîbà adi mémè kuumvwa Dîyì dya Nzambi dyakula, dyamba ne: “Umuka mu njila, lukasa.”

Roy Roberson mwimane mwaba awu, bu mûmvwà mumanye ne yêyè uvwa nkolomu wa mvita, mémè kumuteeka cyanza pa dikaaya, kwamba ne: “Mwaneetu Roy, sokoma, ne lukasa lwônso!”

Yêyè ne: “Ncilumbu kaayi aci?”

Mémè ne: “Umuka mu njila! Sokoma!”

¹¹⁷ Ki mémè kubanga anu ngenda nyunguluka, mémè kuteeka cikasù cyanyi aci panshi, kukudimuka, kuumusha cifulu. Kadi ki Yêyè ulwâlwa ewu, Butumbi bwa Nzambi bupona mu mvunda wâkapanda luseke lwa mukuna mushindu awu, ne kutuuta dikubakuba ne kukankisha mwaba awu mushindu awu, kukosa nsongo ya twitwitu; anu kumutu kwanyi centimètres mitwe ku makumi citeema, lukama ne makumi abidi anyi

lukama ne makumi ataanu. Kupingana bwenda bùbànda bwenze bu mulongoji mushindu awu; ki Bwôbò kutuuta kabidi dikubakuba. Nenku, ki Bwôbò bùlwalwà ebu, misangu yisatu.

¹¹⁸ Pashiishe paaluBu kuumuka, musangu mwisâtù, Mwaneetu Banks kulwa kùndì, wamba ne: “Ki ciine cyûvwà wamba aci anyi?”

Mêmè ne: “Eyowa.”

Yêyè ne: “Civwa ncinyi?”

¹¹⁹ Mêmè ne: “Nzambi utu umwenekela mu mvunda.” Ncivwa mumanye ne Ûvwa ukeba bwa ngambile bantu anyi ncibãmbidì to.

¹²⁰ Dìbà adi mêmè kuya e kusambilaku ndambu. Ki Yêyè kungambila ne mvwa mwa kubambila. Mêmè kwamba ne: “Ndilumbulwisha didì dituute Côte Ouest.” Mutàngilaayi leelu ewu! Tangilaayi cidi cyenzeke mu ndambu wa mēbà paanyima paa cyôci aci: Alaska mmutukine. Ne patudi twakulangana apa cintu mu kaabujima cidi munkaci mwa kubwela mu buloba. Tudi munkaci mwa kwenda kubwela mu dilumbulwisha. Luse ndubengiibwe.

¹²¹ Kadi twasakidila kudi Nzambi, twêtù tudi ne Cyakudya cisokoka, Cyakudya cya nyuma, mutudi ne mwoyi ku bwimpè ne luse bya dibuuludiibwa dya Yesu Kilisto mu matuku a ndekeelu aa, mwikàle uDishindika munkaci mwa cisamba Cyende. Amen! Bakaadi babwele. Eliya wakabwela kumpala kwa mushipu kubangawu. Twasakidila kudi Nzambi bwa kwikala babwele kumpala kwa dilumbulwisha kubangadi. Mpindyewu ncikondo cya dipatuka ne dilwa kubwela, dipatuka dya mu malongolodi awu ne dibwela dya munda mwa Kilisto, cikondo cya dipatuka ne dibwela bwa beena kwitabuuja balelela bônsò.

¹²² Dìbà adi yêyè wakabiikidiibwa, ne wakashaala munda amu. Vulukaayi ne, yêyè kaakuumukaku ku kasulu aku to anu pààkalwà Nzambi kumubiikila.

¹²³ Nenku paanyima paa mushipu awu pabwîpì ne kujika, Yêyè wakamubiikila bwa kupatukamu, ne kupweka kuya kwa mukaji mukamba kampanda. Monaayi, Yêyè ngwákabiikila mukaji mukamba awu. Ne mukaji mukamba mwine ewu kavwaku muswikakane ne beena bupidya to; bavwa bangate cimanyinu cya nyama wa lwonji mu cikondo cya mushipu aci. Pa nanku Wákamubiikila bwa kupatukaye. . . kubiikila Eliya bwa kudiishaye mukaji mukamba ewu. Bavwa ne kaadyâmpà kakese anu kamwe cyanaana, kaacintu kamwepele kavwaye pende mweyemene. Ki Eliya kwambaye ne: “Anji kukampeesha mêmè, dyambedi. Bwalu, EMU MMUDI MUKALENGE WAMBA, cipanza aci kacyakushaala munda mutupu anyi kâsù aku kakaakushaala munda mutupu to, too ne ku dituku dyatuma Mukalenge Nzambi mvula pa buloba.” Kuteeka Nzambi pa kaaba kaa kumpala, Dìyì Dyende kumpala!

¹²⁴ Monaayi ne, kuvwa bukula mu cipanza amu. Musangu wônsò uvwaye uya bwa katunta bukula, kuvwa anu bukula mu cipanza amu. Kuvwa anu maanyi mu kâsù amu, musangu wônsò uvwaye uya kaàkèba. Bwa cinyi? Bukula buvwa buleeja Kilisto mu mulambu wa bukula. Bivwa bikengela bwa ntete yikalè miteekiibwe anu mu mushindu mujaalame, bwa kuvingabo lutete ne lutete lwônsò. Katete ne katete kônsò kaa bukula ebu kiikàle anu kaa mwomumwe menemene, bileeja ne Yèyè udi umwèumwè awu makeelela, leelu, too ne kashidi. Civwa n'Dîyì, Dyâmpà dya Mwoyi dyenda dilonda mukenji, bwa kushindika Dîyì.

¹²⁵ Ki mudibi kabidi leelu ewu, balunda baanyi. Ki mudibi kabidi leelu ewu, bwa Dyâmpà dya Mwoyi dîdì bânà bàdya adi, dilonde Mukenji wa Nzambi, bwa kubadiisha mu cikondo cya mushipu. Kadi bu Yèyè mwa kwikala mwimane mu bwikadi bwetu leelu ewu? Kadi bu Yèyè mwa kwikala mwimane mu bwikadi bwetu patudi twakulangana apa? S'mMufwanyine kwenza anu menemene mwakenzaYe mu matuku avwaYe mu mubidi pa buloba apa awu. Mukaji-musela udi citupa cya Mulume, Ekeleeziya udi cintu cimwecimwe cidi Kilisto aci. "Byenzedi bìndì Mèmè ngenza nenùbyènzè peenu." Ne Dîyì ndidì dicyènzè. Yèyè mmutwâmbile ne bintu byakenzaYe abi twètù peetu netùbyènzè.

¹²⁶ Tudi tumona kabidi mwab'ewu ne, pìikalà Dîyì munda mwetu ne difike kutudi, bu mwakafikaDi kudi Eliya mu dituku adi, Dyôdi nedyènzè cintu cimwecimwe cyakenzaye aci, ùvwa mufwanyine kwikala udyà Bintu bisokoka bya Nzambi bidi bisokoka baa pa buloba abi. Kaa! Kabidi, cidi cyenza ne Mukenji ne musanjeela bìikalè bu umwe. Cyakudya cya nyuma cikaadi cilongolola, ne Cikaadi mu muvù patùdì twakulangana apa. Ne muntu ne muntu wa kunudi udi mwa kupeta Cyakudya eci panwikala nuCijinga, pawikala muswe kukosoloka ne bupidya bwônsò bwa dîbà edi, pawikala mudilongolole bwa kubwela munda mwa Kilisto, bwa kubwela mu mulayi Wende.

Nenku nuvulukaayi milayi Yende, mu Maalaki 4, Luuka 17.30, kabidi ne mu Yone Munsantu 14.12, ne bûngì bwônsò bwa Mifundu, yidì myambiibwe, Yowela 2.38, ne byônsò bivwaYe mwa kwenza, anyi 2.28, eyowa's we, bivwaYe mwa kwenza mu matuku a ndekeelu aa. Ne mwàkambà muprofeta ne nekwikalè Bukênkè mu matuku a ndekeelu aa, muvwaBu mwa kukwata mudimu, civwaBu mwa kwenza, Mifundu yônsò miikàle yifunkuna anu matuku a ndekeelu aa. Ne ciine aci n'Kilisto! Bu wèwè mwa kusokomena mu Aci mpindyewu, mu Mwaba musokome awu, udi mwa kudya ne kumona bwîmpè ne luse bya Nzambi. Pawikala usaama, mwômò amu ki mudi dyondopa.

¹²⁷ Nudi bavuluke musangu uvwa Elisha, pashiishe, mubiikile... Paanyima paa mulambu wa bukula wakapetaye

awu, Kilisto, ne mudiishe naaWu nzubu wa mukaji mukamba awu. Monaayi pashiishe paakatuulwishaye kapyà mu maulu, ne bikwabo, ne kujaadikaye ditumiibwa dyende, kudi Nzambi, Nyuma wa muprofeta.

128 Monaayi mu cipeela, pavwaye mudyādije panshi mwaba awu mwinshi mwa kaci kaa mupenga aku, Mwanjelo wakapweka ne bukula bwa mushindu umweumwe awu, ne wakwosha ndambu wa tûtô ne wakamupa bwa kudyaye. Ne pashiishe ndambu yêyê wakamulaadika cyakabidi tulù, ne wakamubiisha, ne yêyê uvwa kabidi ne ndambu wa tûtô twa bukula abu twosha mwaba awu bwende yêyê. Ne wákenda ku dikanda dya twine tûtô atu munda mwa matuku makumi anaayi. Butumbi kudi Nzambi's we! Yêyê udi umwèumwè awu makeelela, leelu, too ne kashidi. Kaa, mushindu mwine utudi baMunange's we, Cyakudya cya nyuma mu movù waCi!

129 “Kî mbikumbane bwa kwangata dyâmpà dya bânà bwa kudipeesha tubwà to.” Yesu kaakambilaku mukaji wa beena Syrophénicie awu cintu cimwecimwe aci anyi? Yêyê uvwa mutumiibwe kudi bânà Baabo Yêyê mwine. Ncya bushuwa. Nenukù bôbò abu ki baakavwilaYe . . . Yêyê kaakayaku kudi baa Bisamba bya bende to.

130 Nenukù mpindyewu n'Yêyê ewu mulwe kusamba baa Bisamba bya bende pa dyabo dîbà, nenukù kî mbikumbane . . .

131 Wêwè udi wamba ne: “Bwa cinyi Mukenji kawuyiku uya mu myaba minene menemene eyi, bibilu binene bya butangadiki ebi, mudibi munkaci mwa mangumba emu?”

132 Kî n'Cyakudya cyabo bôbò to. Kî n'cya ekeleeziya, wa ku dîna awu to, Cyakudya aci. N'Cyakudya cya Mukaji-musela. N'Cyakudya cya nyuma mu movù. Ncifwanyine kubasaamisha munda. Ncitâmbe kubanjika bwabo bobo. Nwamonu anyi? Nwamonu anyi? Kwêna—kwêna—kwêna mwa kwenza aci to. Kadi, bwa bânà bôbò, Cidi n'Dyâmpà, Cidi m'Mwoyi, Cidi n'Yesu Kilisto umwèumwè awu makeelela, leelu, too ne kashidi.

133 Dîbà neditupite patwikala katuyi tubanga mulongo wa babeedi mpindyewu, pa nanku twinyikaayi mitu yetu bwa katanci kakese cyanaana.

134 Nzambi munanga, Cyakudya mu movù waci, Cyakudya cya nyuma. Cintu kampanda cidi baa pa buloba kabayiku bamanye ne ncinyi to. Mushindu wutūmvù Mukalenge wetu wamba diloolo adi, anyi dituku adi ku Samaaleya kwaka, mwaba umweumwe wākayà Elisha tamakatamaka ne kwambaye ne: “Mona's, lumuma kalwakumataku to too ne pângààlùbìikilà mêmè.” Ki Yesu uvwapu pende ewu mwikàle wambila bayiidi Bende.

Bôbò ne: “Mulongeshi, Wêwè kwêna udyà bwa cinyi?”

Yêyê ne: “Ndi ne Cyakudya cinudi kanuyi bamanye to.”

¹³⁵ Cya bushuwa, Mukalenge, Cyende Cyakudya civwa nkwenza kwa diswa dya Nzambi, kumona byenzedi bya Nzambi bimweneshiibwa mu dîbà Dyende. Ûvwakù mbwa kwenza bwa ne byenzeke. “Ncyêna ngenza cintu nansha cimwe to padi Taatù Wanyi kayi muNdeeje dyambedi. Cidi Taatù uNdeeja aci, ki cîndi Mêmè ngenza.”

¹³⁶ Nenu, Taatù, ki mudibi kabidi leelu ewu. Ekeleeziya, mwena kwitabuuja mulelela, Mubidi wa beena kwitabuuja, badi ne mushindu wa kufika ku Cyakudya, Cyakudya cya nyuma, cîdî beena kwitabuuja baa ku dîna kabayi bamanye ne ncinyi to. Baa pa buloba kî mbamanye cintu pa bidi bitangila Cyakudya eci to, Taatù. Kadi Ekeleeziya Webe, cisamba Cyebe, Mukaji-musela wa Mwan’Ebe, mbadi baCinange.

¹³⁷ Twêtù tudi ne mushindu wa kufika ku dyondopiibwa dya mibidi yetu padi bangangabuka bapangile. Tudi twêtù ne mushindu wa kufika ku cyôcî eci. Ncimwe cya ku Byakudya bya Nzambi, bituYe mupeeshe Ekeleeziya Wende, ne mucilaye bânà Bende badi biitabuuja mu matuku a ndekeelu. Taatù, utukwacisheku bwa twikalè bânà badi biitabuuja, bwalu bintu byônsò bidi mwa kwenzeka bwa beena kwitabuuja. Enzaku nanku, Nzambi Munanga. Tudi tulomba nunku mu Dîna dya Yesu. Amen.

¹³⁸ Ngeela meeji ne Billy mmungambile ne mbaabanye ndambu wa twarta twa disambila. Bu muntu mwa kungambilaku dileeta didi pa karta kaa disambila, ki cyônsò cîndi nkeba. [Muntu mukwabo udi wamba ne: “C.”—Muf.] C, eyo, twangataayaaku C, umwe, tubangila apu, too ne pângààbangà mulongo wetu. Nwamonu’s, mpindyewu, twôtò atu tudi mwa kwikala myaba yônsò. Mpindyewu, piikalà bantu bônsò...Ee, nwamonu’s, nêngikalè mwa kuteeta eci. Ncyêna mumanye ne tudi mwa kucyenza anyi katwena mwa kucyenza to. Anyi tudi mene anu mwa kubiikila mulongo utudi tubiikila awu; nwênù sômbaayi anu bapuwe. Kabyena bintacisha mêmè to. Bu nwênù mwa kujinga kubânda kuneeku pa cibumba cya ku cyambilu apa, anyi kwenza mulongo utudi tubiikila awu, kabyena anu ne bwalu to, umwe wa ku mishindu ayi. Mêmè ndi ngeeyemena anu Nyuma Mwîmpè nkaayende. Ndi ngeeyemena cya ne Yêyè ngwâtwa Diyî dîngàâyîishî edi nyama ku mikolo.

¹³⁹ Mwaneetu George Wright, mêmè ndi nDîitabuuja. Kubangila pâncîvwa mwânà mutekete, pâmvwa ngenda mpweka mutangile kwebe aku apu kukaadi bidimu byâbûngî, nteeleja nyuunyi mukole wa lubuta mâlênji uvwa musômbèle mu mucu awu awu, ncidi anu ngiitabuuja Mukenji umweumwe awu. Ndi ngiitabuuja ne ng’Wôwò umweumwe awu.

¹⁴⁰ Eyo, ndi mmona benda bashiya kaaba paanyima apa bwa mulongo wa babeedi. Eyo, karta kaa disambila kaa C, nomba umwe, ibidi, isatu, inaayi, itaanu, anji lwâyi nwimane anu lwâ

kaaba aka. Pawikala kuyi ne mushindu wa kajuuka to, bu wêwè anu mwa kwela cyanza cyebe muulu, bamwe baa kudibo nebakwambule. [Muntu mukwabo udi wakula ne Mwaneetu Branham—Muf.] Ncinyi ciine aci? Eyowa. Uh-huh. Karta kaa disambila kaa C, umwe, ibidi, isatu, inaayi, itaanu. Kadi mpindyewu monaayi, wêwè udi kuyi ne karta kaa disambila awu . . .

¹⁴¹ Mpindyewu, nciitu mwanji kwenzaku mulongo wa babeedi wa mushindu ewu to kukaadi ntanta mule, mule. Mbanganyi badiku bavuluke mudimu muntuma naawu patwakiibaka tabernacle kaaba aka? Wàkamba ne: “Enza mudimu wa mutangadiki.” Kàakamba ne mvwa mutangadiki to. Wàkamba ne: “Enza mudimu wa mutangadiki,” nwamonu’s, “bwalu dîbà nediilwe dyashintuludiibwa cyôci aci.” Dîbà adi dilwalwa. Eyo. Mpindyewu, mu eci, Yêyè . . .

¹⁴² Kwêna mwa kubambakaja midimu ya bwambi yibidi anyi yisatu mishiilangane, mpaasata ne mutangadiki, musangu umweumwe awu to. Kwêna mwa kwikala muprofeta ne—ne pàmwâpa mpaasata, musangu umweumwe awu to, nwamonu’s, bwalu udi ne midimu mishiilangane, mudimu wa bwambi mushiilangane.

¹⁴³ Kadi Mukalenge utu mumpé civwa cikengela mêmè kwenza mu Mukenji wanyi. Kadi musangu awu Yêyè wàkamba ne: “Enza mudimu wa mutangadiki, ufile cijaadiki mu kaabujima cya mudimu webe wa bwambi, bwalu dîbà nedilwe dîikalâbo kabayi mwa kutwala Dilongesha dishindame to.” Piikalâbi ne aci kî ncilwe mpindyewu to! Ekeleeziya yônsò wa cyena mangumba wâmbèngi. Kî mbaswe kutwala Dilongesha dishindame to. “Kadi mu dilonda dya nkuka yabo bôbô biine nebaditwadile balongeshi baabo bôbô, ne nebakudimukile ku myanu. Ne nebènzè bintu binene bya byenzedi bya bulobo mwàkenzà Yane ne Yambele bàakakândameenà Môsà abu, kadi dikutakana dyabo nedimweneshiibwe.” Nwamonu anyi? Nwamonu anyi? Eyo, ditentula’s! Nudi numona muvwa Yambele . . .

¹⁴⁴ Nenku, Nzambi mu Dyulu mmumanye, aci nciiteekiibwe mwamwa mene mu dibwe dya mu ditumba . . . (dya tabernacle) . . . dya mu ditumba kubangila mu cidimu cya 1933, cifunda pa dibeji kampanda dya Bible, citeekiibwe anu mwômò amu. Tangilaayi numone mudibo bacyènzè. Tangilaayi numone cidi cyenzeke. Ditentula, anu menemene. Mmwambe ne: “Ubalekele, dikutakana dyabo nedimanyike mu mushindu umweumwe ne dya Yane ne Yambele.” S’ki twètù bàkaadi boobeke mu diine dituku adi aba.

¹⁴⁵ Ngâkamòna ekeleeziya piine apu patucivwa tuteeka dibwe dya mu ditumba apu, bantu balemebelele ku mibangubangu ya madidiishi ne ku nyungulukilu kwônsò aku, biimane banyungulukile bimanu bya tabernacle. S’ki bwalu mbwòbù

abu. Bavwa bamba, pààkabàndà bimanu, bantu baa mu cimenga eci, bamba ne: “Mu cipoolo cya ngondo yisambombo. . .” Peetu biikàle ne ndola umwe ne meeyà makumi mwandamukulu [2.970 Fc] bwa kwibaka tabernacle, bantu bààbûngì beena bilongolwedi bya mashinyi bakaavwa bangate dipangadika ne neciikalè cilongolwedi cya mashinyi. Kadi’s nyewu cicidi anu lupangu lwa mikooko bwa Mikooko ya Nzambi.

¹⁴⁶ Umwe, ibidi, isatu, itaanu, isambombo, mwandamutekete, mwandamukulu, citeema, dikumi. C, isambombo, mwandamutekete, mwandamukulu, citeema, dikumi. Eyo.

¹⁴⁷ Mpindyewu: “Mèmè Mukalenge ngudi mucikune, Mèmè ngwacimyamina màyi muunya ne bufuku bwa muntu kalu kucinyenga ku cyanza Cyanyi.” Tangilaayi kadyuwu! Kakuyi dingumba nansha dimwe bwa kuCitwa nyama ku mikolo to. Kakuyi ekeleeziya mifwanangane naaCi mu nyungulukilu wa ditunga edi to. Kakuyi Mpenta nansha umwe mu ditunga, cintu cikwabo nansha cimwe bwa kuCitwa nyama ku mikolo to. Bantu bônso balwishangana ne dibatiiza dya mu màyi, bônso balwishangana anu ne bintu bikwabo byônso ebi. Nansha famiye wanyi mwine, taatù wanyi mundedi kungiipata kumbelu, mèmè kwambwila bilàmbà byanyi mu kafuku kakese kaa cikandakanda e kuya kasòmbela mu New Albany. Cya bushuwa’s.

Kadi mu njiwu yàbûngì, midimu ya lutatu ne mateyi,

Mmûnkaadi mupicile;

Ngàsà ngudi mungendeshe mu dikubiibwa mumfikishe too ne apa,

Nkaadi ne bidimu makumi itaanu ne bisambombo, kadi abidi adi panshi aa nebikengele bwa mèmè kusabuka musulu.

Ngàsà ki watungunuka naanyi.

Pàngiikalà nkaadi kwaka bidimu binunu dikumi,

Nkenka mbalakana bu dîbà;

Katwakwikala ne matuku mashaadile a kwimba butumbi bwa Nzambi

Kupita patwakabanga nansha.

Kaa, mushindu mwine wûndi munange Yesu’s we! Yêyè ki buloba bujima bwanyi mèmè!

¹⁴⁸ Kaa, eyo, mbanganyi bâmvwà. . . Mvwa mwimanyine penyi, pa dikumi anyi? Tudiku mwa kwangata tukwabo anyi? Eyo. Civwa ncinyi, dikumi, dikumi ne itaanu anyi? Eyo. C, dikumi too ne ku dikumi ne itaanu, mwaba wônso wûdi awu, pawikalaku ne mushindu wa kujuuka ne kubwela. Wamba ne? Huh? Eyo. C, dikumi ne itaanu too ne ku makumi abidi, dîbà adi. Ciikalèku C, dikumi ne itaanu too ne ku makumi abidi. Aci ncifwanyineku kwikala bantu bakwabo dikumi baa pamutu. Tudi tumona. . .

Nudi numona—numona mwaba udi mulongo mushiikile wawa, katwena tubafikisha—tubafikisha ku dikungwila to. Nenku netwikalè. . . Eyo.

¹⁴⁹ Mpindyewu mpaayi ntema yenu yònsò; katwakunenga to. Kadi, mpindyewu, kaa, dîbà kaayi, cikondo kaayipu's we! Ndi—ndi njinga ne muntu ne muntu ikalèku ne mushindu wa kunanga Mukalenge. Ndi—ndi njinga ne twètù bònsò twikalèku ne mushindu wa kufika kaaba aku bwa kuumvwa dikumbana dya kwenzeka kwa maalu kwa mu kasunsa aka. Tuciteetaayi. Mpaayiku anu ntema yenu.

¹⁵⁰ Citudi—citudi tuteeta kwenza kaaba aka ncinyi? Tudi tucicishila Dìyì dya Nzambi ku diteeta. Eliya wakenza cintu cimwecimwe aci, kupatukaye e kuya pa mukuna paanyima paa yêyè mumanye ne ùvwa mutumiibwe kudi Nzambi bwa kucyenza. Kwambaye ne: “Mpindyewu tujaadikaayi ne udi Nzambi nganyi, Nzambi udi wandamuna ku kapyà awu ikalè Nzambi.”

¹⁵¹ Ki bampangaanu abu kuditapa mputa, kaa, bamba ne: “Ee, cya bushuwa, kakuyi. . .” Bampangaanu abu's bavwa bamanye ne kapyà kakavwaku mwa kumata to, ki kwelabo mbila mikole ne kwenzabo bintu bya lukutukutu abi.

¹⁵² Kadi Eliya uvwa yêyè mumanye ne kavwa kamata, bwalu ùkaavwa mupete cikeena-kumona cya kudi Mukalenge.

Wêwè udi wamba ne: “Mupete cikeena-kumona?”

¹⁵³ Eyowa's, mukalenge! Paakamanaye kuteeka bintu byònsò mu bulongame, wàkamba ne: “Mukalenge, nyewu ngènji byònsò ebi bilondeshile dìyì Dyebe dituma.” Ki pashiishe kapyà kubangaku kumata. Padi Dìyì dya Nzambi dilamiibwa ku dileeta ne ku dileeta, dîbà adi bwalu bwàshààdidi Nzambi bwa kutangila bikwabo bìdì bishaala. Yêyè udi ukulomba anu bwa wêwè kucyela patooke mwaba awu. Kadi wikalè mutwishiibwe ne wêwè ngudi mubiikidiibwe bwa kucyela patooke mwaba awu. Nwamonu anyi? Ne pawikala mubiikidiibwe nanku, Yêyè ki watangila bikwabo bìdì bishaala abi.

¹⁵⁴ Mpindyewu, ki bantu mbòbò aba bìikalà mwa kupicila mu mulongo ewu bângìikalà mwa kusambidila. . . Mpindyewu, ee, nukaadi anu pabwìpì ne kutwa ku cimanu mpindyewu, eyo, bwa mulongo kubangawu. Mpindyewu, dyambedi, lwà mwaba kampanda apa mu citanda emu, bamwe bantu. . .

Mbanganyi badi basaama mwab'ewu kadi kabayi ne karta kaa disambila, elaayi byanza byenu muulu. Nwamonu's, anu myaba yònsò. Mpindyewu, nudi bamanye ne bu Mukalenge wetu. . . Ne mêmè ndi ngiitabuujà ne Yêyè neénzè, piikalàYe umwèumwè awu makeelela, leelu, too ne kashidi. Yêyè wakenza milongo ya babeedi. Bantu bavwa balwa kudiYe mu milongo minene, misumbà mijima, Yêyè ubalenga, ubabenesha. Pashiishe Wakiimanyika ndambu wa dîbà wamba ne: “Wàndengi awu

nganyi?” Dya ukenzakana, kwambila mukaji mukwabo bwa cinyi uvwa muMulenge; ne kwamba ne mashi ende avwa alwa munda awu akajika, diitabuuja dyende dyakamwondopa.

¹⁵⁵ Kadi bu ne yêyè awu wakakudimuka kwamba ne: “Ee, ncyêna mumanye’s, Mukalenge, paanyi’s ndi moolaale ne dîsaamà edi kukaadi ntanta mule?” Nunku kî ncyenzeke to. To, nunku kî ncyenzeke to. To.

¹⁵⁶ Kadi bu Yêyè mwambile mukaji wa beena Syrophénicie awu ne: “Bwa dîyî diwâmbi edi, mwaneebe wa bakaji, démon awu wâpâtuku munda mwende,” ne yêyè pende mwambe ne: “Ee, mpindyewu, Mukalenge, mêmè—mêmè paanyi’s mvwa muswe bwa Wêwè kucyenza mushindu *kampanda*”? Démon awu—awu nunku’s mmutungunuke anu ne kwikala munda mwa mwânà wa bakaji awu. Kadi yêyè uvwa mwindile ne neakasangane mwanende awu mu mushindu uvwaye Yêyè mwambe ne neakamusangane awu.

¹⁵⁷ Mpindyewu, Yêyè mmutwâmbile ne: “Bu wêwè mwa kwitabuuja! Bu wêwè mwa kwambila mukuna ewu ne: ‘Tentemuka,’ ne kuyi wela mpatà mu mwoyi webe to, kadi mwikàle witabuuja ne ciwâmbi aci necyenzeke, udi mwa kucipeta. Paudi usambila, ikala mwitabuuje ne udi ucipeta, nebakupeesheci.” Mulayi kaayipu’s we!

¹⁵⁸ Mpindyewu muntu utu uyiisha evanjeeliyo wa nsòmbelu mulenga katu witabuuja aci to nansha kakese. Yêyè mmufwanyine kuya tamakatamaka too ne ku ciibi, kwintangila munda, anyi kushaala kacya wimana mwaba awu, wamba ne: “Ee, ewu’s udi anu mmusumbà mukwabo wa bantsantu babunguluki baa mu malaba’s,” kadi kuumuka kuya. Nwamonu anyi? Kadi kayi umanyaku ne eci n’Cyakudya cisokoka to. Kayi umanyaku ne eci n’Cintu cisokome cidibo bamusokoke to. Kî mmucimanye to. S’mbyenze—mbyenze—mbyenze ne luse, meeji miikàle butaka, mwena dikenga, mpofu, kadi kayi mucimanye to. Nwamonu anyi? Aci’s ncintu cibi.

¹⁵⁹ Éyi Nzambi wa yaaya, undekeleku ndyanjile kufwa, kadi kumfikishiku mu mushindu awu to. Mbipiciibwe ne mêmè mufwe (eyowa’s, mukalenge) pamutu paa kwenza aci. Ngeela meeji ne muntu ne muntu wa kutudi mmufwanyine kujinga aci, kî mmwômò anyi? [Disangisha didi dyamba ne: “Amen.”—Muf.]

¹⁶⁰ Kadi, mpindyewu, Nzambi mmutulaye bintu ebi mu matuku a ndekeelu. Mu Maalaki 4, mmwambe ne Yesu Kilisto uvwa mwa kutuuluka ne kuDifwanyikija mu mubidi wa buntu bu mwakenzaYe ku Sodoma. Ncya bushuwa. Ne mmwambe ne buloba buvwa mwa kwikala mu ngiikadilu wa Sodoma. Ne Wâkamba ne: “Anu mwakadibi musangu awu, Mwânà wa muntu neabuuludiibwe mu dituku adi.” Nwamonu’s, Muntu ewu wâkatùuluka mu mmwenekelu wa muntu, uvwa “Elohim” awu, bwa Abraham, kumpala kwa mwânà mulaya ewu kulwaye.

Tangilaayi civwàku, Abraham wàkamba ne civwa n’Nzambi. Ne Bible mmwambe ne kuvwa bantu basatu bààkalwa kudiye, ne lupwishi ku bilàmbà, mu lwendu, kusòmbabò ne kudyabo bu bantu. Ne Yesu wàkamba ne: “Anu cikondo cidi buloba bulwa mu ngikadilu wa Sodoma aci, dîbà adi Mwànà wa muntu uvwa mwa kuDibuulula cyakabidi.” Kayi Mwànà wa Nzambi to, Mwànà wa muntu, nwamonu’s, ùvwa mwa kuDibuulula.

¹⁶¹ Mpindyewu fwanyikijaayi aci ne cyàkambà muprofeta wa ndekeelu ne: “Monaayi, Ndi nnutumina Eliya muprofeta, ne yèyè nealujulule myoyi ya—ya bânà kudi baataatù.” Nwamonu anyi? Mukenji bwa kubaaluja ku Bible, ne Mwànà wa muntu neikale munkaci mwa kuDibuulula mu dituku adi. Ne mu dituku adi dya dyela dya mpungi wa cikondo cya ndekeelu cya ekeleeziya, mwanjelo wa mwandamutekete, maalu masokoka a Nzambi adi ne cya kumanyishiibwa mu dituku adi. Bitampi Mwandamutekete bivwa mwa kukangudiibwa. Maalu masokoka a ekeleeziya yònsò eyi ne bikwabo, mwakenzekabi, ne cyakenzek- . . . mushindu kaayi, cidi cyenzeke.

¹⁶² Nwamonu’s, kî mbaCimanye to. Yesu wàkamba ne: “Nwènù Bafaalesa bampofo aba!” Yèyè ne: “Mpofò yèyè ulombola mpofò, bubidi bwabo kabaakupona mu mukidi anyi?” Nwamonu’s, ki bwa cinyi bantu abu kabeena bamona Cyôcì aci to.

¹⁶³ Bwalu bwaCi busokoka, budi ne, Bitampi abi, yònsò wa ku ekeleeziya ayi wakenza bulongolodi kadi kubwelamu, ne ki cimwe cya ku bintu bisokoka bivwà bibi kumpala kwa Nzambi ncyôcì aci. Wacimonu anyi, Docteur Lee? Nwamonu’s, tangilaayi. Ncyôcì. Ki cyôcì cintu aci mwaba awu mene. Ki umwe wa ku minsokontu ngwôwò awu. Baakadyenza bulongolodi, ne monaayi, ne ciine aci civwa anu menemene pambelu paa diswa dya Nzambi. Ne cyôcì aci necyediibwe patooke mu matuku a ndekeelu, kadi kulombola bantu, kabiyi bwa kubafikisha ku twitabaayi anyi ku dingumba to, kadi bwa kubaaluja ku Dîyi dilelela. Ne Dîyi dilelela nedilwe kudi kasumbu kampanda kaa bantu, ne Mwànà wa muntu neaDibuulule munkaci mwabo, “umwèumwè awu makeelela, leelu, too ne kashidi.”

¹⁶⁴ Kaa, ekelekele! Kaa, mêmè ntu munange aci’s. Ntu munange—ntu munange kuMutwa makumbu. Ntu munange—kuMuvwija munene kumpala kwa bantu. Kabyena bikengela bwa mêmè kuMuvwija munene to; Yèyè’s ukaadi mumane kwikala munene. Yèyè mmutumbuke mu mushindu wa kuyi mwa kupicila pamutu Pende, ne ndondo mu mushindu wa kuyi mwa kupicila mwinsi Mwende, mwalabale mu mushindu wa kuyi mwa kuMucinguluka to, kadi cibì wèwè mwikàle ne kaaba mu mwoyi webe bwende Yèyè. Kwènàku muswe bwa kuMwakidila anyi? Mushindu mwine udi Mukalenge wetu mulengele’s we! Eyo.

¹⁶⁵ Mpindyewu tushaalaayi anu bapuwe menemene, bantu bônso. Mpindyewu, twakulu pa Cyôci eci. Nenku bwalu bùdi mwaba awu budi anu ne, Cyôci aci ncilelela anyi? Mpindyewu, kudi mwa kwikala beenyi muneemu emu. Ndi mufwanyine kwamba ne pìikalàbi... bwebe wêwè, pìikalàbi ne Kilisto udi umwèumwè awu makeelela, leelu, too ne kashidi, cidiYe mufwanyine kwenza ncinyi mu kasunsa emu? M'Mufwanyine kwenza cintu cimwecimwe cyakenzaYe pavwaYe panwapa kumpala aci. Ncya bushuwa anyi? Diitabuwa dya bantu ndifwanyine kulenga civwalu Cyende, ne Yêyè mufwanyine kukudimuka. Anu mwakenzelaYe mukaji wa ku ciinà cya mâyi awu amu, ne mwakenzaYe mikwabo myaba amu, ne mwakajingululaYe meeji abo amu.

Mpindyewu wêwè udi wamba ne: “M'Mufwanyine kungondopa mêmè ewu anyi?”

¹⁶⁶ Dìyì Dyende ndyambe ne Yêyè ukaadi mumane kwenza aci. Kadi bwalu bùdi mwaba awu budi ne, kuDimanyisha ne Yêyè udi mwab'ewu.

¹⁶⁷ Mpindyewu, bu Yêyè mwa kutumwenekela mu mubidi wa musunya, mwikàle menemene ne mmwenekelu anu wa dizola dya Hofmann dya *Mutù wà Kilistò wa Bidimu Makùmi Àsàtù nè Bisàtù* adi, ne mashi bipweka mu cyanza Cyende, ne bikwabo, bibangu bya misonso pambidi Pende pajima, mêmè ncyèna mufwanyineku kuciitaba nansha. To, to. To, to. PaalwaYe, Yêyè mwine, “Disù dyónso nediMumone, ludimi lwónso neluMujikule; ne anu mudi mukenyi wela wumukila ku Esete ukiitabila ku Weste amu, ki mwikalabi.” Nwamonu anyi? Twêtù katwenaku twitabuuja tusumbusumbu ne tusumbu atu nansha. Tudi twêtù twitabuuja ne Nzambi n'Dìyì.

¹⁶⁸ Kadi Yêyè udi uDibweja mu mubidi, wangata mubidi webe wêwè ne mubidi wanyi mêmè, ne ukupa wêwè mapà, ùmpà mêmè mapà, nenku ku mapà awu Yêyè uDimanyisha. Ki Cyakudya cisokome ncyôci aci. Nansha Yêyè mufwanyine kuDimanyishila kùndi mêmè mushindu kaayi, bikengela nwènù kuCiitabuuja, bikengela nwènù kwikala ne dipà dya diitabuuja, nwènù peenu, bwa kuCiitabuuja. Nudi nwtitabuuja nanku anyi? [Disangisha didi dyamba ne: “Amen.”—Muf.] Nenku mpindyewu bu Yêyè mwa kuDimwenesha mushindu awu, nenuMwtitabuuje anyi? [“Amen.”] Ne mwoyi wenu wónso, nenuMwtitabuuje anyi? Kaa, bilenga be, ndi anu muMwindile, ndi anu mwindile bwa kumona cidiYe wamba.

¹⁶⁹ Muntu nyêyè ewu mwimane apa. Mêmè ncituku mwanji kumumona kacya bandela to, bwa ku dyanyi dimanya. Mmumweneke bu muntu mwîmpè, wa dikanda, ne mubidi tumatuma, ne pàmwàpa ki cidiye, ncyèna—ncyèna—ncyèna mumanye. Kadi nyawu mwimane mwaba wawa. Mpindyewu, ndi mufwanyine kuya katentekela muntu wawa byanza ne

kumusambidila, kumukonka nî mmufwanyine kwitabuuja. Mmufwanyine kwimana apa ne kungambila, ne: “Ndi—ndi—ndi muswe bwa usambidile *Kampanda*. Ne ndi—ndi ne makàsà mafubidile. Ndi ne mutu unsaama, ku musangu ne ku musangu. Ndi ne byùjà mu cifu,” anyi cintu kampanda. Yèyè—yèyè, mèmè ncyèna mumanye to. Mmufwanyine kwamba cyònsò cya ku bintu abi.

¹⁷⁰ Ndi mufwanyine kwamba ne: “Eyo, mukalenge, mwaneetu. Nènkutentèkèlè byanza nkusambidile.” Aci ncifwanyine kwikala anu cîmpè menemene. Aci’s ncitukaadi benzenze anu menemene mu cikondo cyònsò eci. Ncya bushuwa anyi?

¹⁷¹ Kadi, vulukaayi ne, Yesu wàkamba ne nebùikalè bishiilangane ku cikondo menemene cya Dilwa Dyende, bu mwakadibi mu matuku a Sodoma. Ne Muntu wàkalwa awu, uvwa mwele nyima Wende ku ntenta kuvwa Sarah usanganyibwa aku, ne Wàkamba ne: (kî ng’“Abram” to, mpindyewu) “Abraham.”

¹⁷² Nwamonu’s, yèyè uvwa Abram, dituku divwa didyànjàle. Kadi uvwa mupete cikeena-kumona, Mukalenge mumwambile ne: “Nènshintululè dîna dyebe.”

¹⁷³ Kadi ki Mukalenge nyewu, Yèyè mwine, mu mmwenekelu wa muntu, udyà ne unwa nende. Yèyè ne: “Abraham, mukajeebe udi penyi, Sarah?” S-a-r . . . r-a-h; kayi S-a-r-r-a to.

Yèyè ne: “Ùdi mu ntenta, paanyima Peebe apu.”

¹⁷⁴ Yèyè ne: “Nènnùmwenèkelè, bilondeshile mulayi Wanyi wa kukaadi bidimu makumi abidi ne bitaanu awu.”

¹⁷⁵ Ki Sarah kwenzaye bu wadisekedi mundamunda. Yèyè ne: “Sarah nyawu waseki mu ntenta amu anu mwaba awu, wamba ne: ‘Abi bintu bidi mwa kwenzeka munyi?’” Uh-huh. “Kudi cintu nansha cimwe cidi cikolele Nzambi anyi?” Nwamonu anyi? Nansha cimwe. To, mukalenge.

¹⁷⁶ Mpindyewu Yèyè wàkamba, Yesu wakalaya ne: “Yèyè, Mwànà wa muntu,” udi mwikàle Dìyì awu, (nudi nwtabuuja nanku anyi?) “ùvwa mwa kulwa mu matuku a ndekeelu ne kuDibuulula mu cikondo ciikalà buloba bufwanangane ne Sodoma ne Gomola.” Nudi nwtabuuja ne mmwòmò anyi?

¹⁷⁷ Kumpala kwa twètù kwenza disambila nansha dimwe, bamwe baa kunudi aku basambile ne bamone Mwànà wa muntu ní udi umwèumwè awu makeelela, leelu, too ne kashidi anyi. Konkaayi anu cyanaana ne ke cidiYe anyi, nwamba ne: “Mukalenge, muntu ewu kî mmumanye to, kadi ndi mumanye ne Wèwè udi umweumwe awu makeelela, leelu, too ne kashidi,” kadi numone Yèyè ní udi unwambila cyòci aci.

Eyowa’s, mukalenge. Mpindyewu anji bandululaayi mitu yenu bwa katanci kakese cyanaana.

¹⁷⁸ Mpaanyima paanyi apa. Mmwânà. Mmuteeme kapya patudi twakulangana apa ne mubidi luuya. Nkânà kakese kaa bakaji. Udi mufumine pambelu paa cimenga. Mwânà udi ne dîsaamà dya cifu. Ncivwaye naaci. Itabuuja anu cyanaana.

¹⁷⁹ Mpindyewu, aci ki cyàkambàYe ne Neenzè anyi? Ncituku mwanji kumona muntu wawa to kacya bandela. Nzambi mu Dyulu mmumanye nanku.

¹⁸⁰ Muntu udi apa ewu, ùdi umweka ne makanda àbûngì ne mubidi tumatuma. Kadi nudi numona mundidimbi udi kumutu kwende wawa anyi? Cidi cyumvwija ne, anu Nzambi mumukwacishe, cyanaana yèyè kaakulaalaku bikole panwapa to. Ùdi ne kansere. Kàdi mu bisulusulu byebe amu.

Mpindyewu, Mwânà wa muntu udi kaaba aka.

Yèyè ewu udi ne bujitu mu mwoyi wende bwa mwânà mutekete kampanda wa balume, mwânà mutekete. Ncya bushuwa anyi? Udi witabuuja ne Nzambi udi mwa kungambila cidi citacisha mwânà awu anyi? [Mwaneetu wa balume awu udi wamba ne: “Ndi mumanye ne Yèyè udi mwa kukwambila.”—Muf.] Ùdi mwa kungambila. Mwânà awu udi wenza tuntanta tukese twa dipaluka dyenze bu ciseki. Mmufume ku dyenza cyôci aci kí nkwanji kwenza ntanta to. [“Mu dinda emu.”] Ncya bushuwa, mu dinda emu. Ne wèwè udi witabuuja ne newikalè ne mwoyi bwa kukolesha mwânà wa balume awu, ne yèyè neùmvwè bîmpè anyi? [“Eyowa.”]

¹⁸¹ Charlie Cox udi lwà penyi? Ùdi lwà penyi? Charlie, udi lwà penyi? Mwua mwele meeji ne yèyè udi apa diloolo edi. Apa, Charlie. Gary, udi lwà penyi? Larry, ùdi apa anyi? Mwanende mukese wa balume uvwa ne cintu cimwecimwe aci, cintu anu cimwecimwe aci menemene. Udi lwà penyi, Larry? Anji vwilabi apa. Ee, s’ki wèwè ewu. Mwânà mukese wa balume ewu uvwa ne cintu cimwecimwe aci. Tatwëndè ne mamwëndè mbalunda baanyi baa katapula-kateeka. Kukaadi bidimu kûmvwà mupweke kwôkò aku, nenku mwânà mukese wa balume ewu uvwa mwa kupaluka, ujimija lungenyi kaciyi umanya cintu nansha. Civwa nciseki. Mêmè kucikwata pa mwânà mukese wa balume ewu, kulomba Nzambi bwa kumwondopa. Kacya anu piine apu katu mwanji kupalukaku kabidi musangu nansha umwe to. Ki tatwëndè wawa; mamwëndè mmusòmbe mwaba kampanda muneemu emu; ne mwânà mukese wa balume’s ki yèyè ewu, yèyè mwine.

¹⁸² Mpindyewu udi witabuuja anyi, mukalenge? (Twasakidila, Larry.) Udi witabuuja anyi, mukalenge? Nzambi wa mu Dyulu anyisheku akwenzele cintu cimwecimwe aci, ne bwa wèwè kwikala ne mwoyi bwa kukolesha mwânà awu. Nzambi akubeneshe.

Tusambile.

183 Nzambi munanga, umukwacisheku. Ndi ndomba bwa luse Lwebe ne ngàsà biikalè pambidi pende ne umubenesheku. Mu Dîna dya Yesu.

184 Alukilaaku ku Louisiane mpindyewu, musanke, utumbishe Nzambi bwende yêyè.

185 Kaa, eyowa's, yêyè uvwa wa ku Louisiane, cya bushuwa, lwà ku Lake Charles. Cya bushuwa. Nwamonu's, ndi mwa kubakula meeji enu mpindyewu. Butumbi kudi Nzambi!

186 Ee, udi ulomba ci—cintu cîmpè, udi muswe kupeta mwânà. Ukààdi mupete bânà, bânà babìdi, kadi udi ujinga mukwabo. Nzambi wa mu Dyulu anyisheku akupe yêyè awu, mwaneetu wa bakaji. Lwàku apa, ndi muswe anu nkutenteketele byanza cyanaana.

187 Nzambi munanga, peeshaku mukaji ewu dijinga dya mwoyi wende, bwalu nkabingila kaa mushinga. Mu Dîna dya Yesu. Amen.

Mpindyewu ndaaku upete mwânà awu.

188 Nzambi n'Nzambi mwîmpè. Nudi nwitabuuja nanku anyi? [Disangisha didi dyamba ne: "Amen."—Muf.] Mmumanye byònsò bitudi naabi dijinga. Udi ukumbaja dijinga dyònsò ditudi naadi patwikala twitabuuja nanku. Yêyè mmwambe ne: "Bu wêwè mwa kwitabuuja!"

189 Nkaadiku mukulabule ku cyanza mwaba kampanda. Ncyêna mvuluka ne pavwa mpenyi to, kadi kuvwa mmwaba kampanda wûmvwà mukulabule ku cyanza. Ncyêna mvuluka anu menemene to, kadi tuvwa tusanganyiibwa anu mwaba kampanda, mwaba kampanda leelu ewu, kadi ncyena mumanye ne pavwa mpenyi to. Kadi kî nkwòkò aku, kî ncutidi bavwile bwa kwakula mwab'ewu to. Wêwè udi mwaba ewu bwa kwakula, anyi bwa kusambila, ukeba bwa mêmè kusambidila muntu mukwabo kampanda. Ncyà bushuwa. Yêyè awu kàtu muneemu to. Ùdi mu Géorgie, ùsaama. Kabyena anu ne ùdi ùsaama, mu mubidi emu to, kadi ùdi ùsaama mu nyuma; mmwaneenu wa mu famiye. Udi witabuuja ne Nzambi neatangile bwalu ebu bwalu wêwè udi mwangate kaaba kende anyi? Udi witabuuja anyi? Lwàku apa tusambile pamwe.

190 Nzambi munanga, peesha muntu ewu dijinga dya mwoyi wende, bwa yêyè aye kasangana muntu ewu wela mbila mikole bwa kupeta Nzambi. Mu Dîna dya Yesu mmûndi ndomba bwalu ebu. Amen.

Nzambi akubeneshe. Kwedi mpatà to. Itabuuja ne mwoyi webe wònsò.

191 Wetwawu! Kacivwa bwa nanku bûmvwà nciyi mukwolwele cyanza bwa kukulabula ku cyanza dîbà adi to, pawòlòlù cyanza apu, mvwa munkaci mwa kumona cintu kampanda. Civwa mmundidimbi, mufiike wa fitutuu. Ki kabingila nkòkò

aku. Ndi mumanye ne bu mêmè mukukwate ku cyanza, mvwa mufwanyine kucisangana mushindu awu, wamonu's. Kadi nkansere. Udi witabuuja ne Nzambi udi ne bukole bwa kukùmusha anyi? Kadi pa dibeele dyebe apu, dya dyabakaji. Udi muswe kwalukila ku Caroline ne kutumbisha Mukalenge bwa diikala dyebe dya ne bukole bwa mubidi, kî mmwômò anyi? Udi muumvwe cîndi muswe kwamba aci anyi? Tusambilaaku.

¹⁹² Nzambi munanga, mu Dînà dya Yesu Kilisto, Yèyè mene Udipù mpindyewu awu; bânà munkaci mwa kudya Dyâmpà dya Nzambi, swaku bwa ewu mwânà asankileku pende diitabuuja adi, Dyâmpà dya Nzambi didiYe umupa mpindyewu bwa dyondopiibwa dyende. Swaku aye ne ikalè ne bukole bwa mubidi, mu Dînà dya Yesu. Amen.

Nzambi akubeneshe, mwaneetu wa balume. Itabuuja ne mwoyi webe wônso.

Wetwawu!

¹⁹³ Eci kî ncikondo cilenga cya dikema anyi? Mbyenze anu bu ne kaneemu kampana nkiikile kumutu kwa bantu's. Anyi, bidi pâmwâpa mwa kuumvwika, ku aanyi maci, anu bu cintu ciikâlè cyenza ne: "Wuu!" Ciikâlè cyenza anu mutooyi, ne: "Wuu," mushindu awu, nwamonu's. N'Dyâmpà dya bânà adi. Nwamonu anyi? Ndyenu nwênù. Didi bwenu nwênù. Kadyena bwanyi mêmè to; Didi bwenu nwênù. Mêmè ndi ne kusakidila kwâbûngi, anu bwa dîbâ edi mpindyewu, ncyêna. . . Ndi ne bukole bwa mubidi, bwa ku dyanyi dimanya; kadi N'Dyâmpà bwanyi, mêmè paanyi, pândi naadi dijinga. Didi n'Dyâmpà bwenu nwênù. Ndinûtwa dya nyama ku mikolo. Bwenu nwênù badi kanuyi nansha nusaama abu, cidi anu cituntumuna myoyi yetu kumpala kwa Nzambi.

¹⁹⁴ Eci cidi menemene anu mu movù waci, cyâkambàYe ne Neënzè aci: "Anu bu mwakadibi mu matuku a Sodom, ki mwikalabi kabidi ku dilwa dya Mwânà wa muntu, piikalà Mwânà wa muntu ne cya kubuuludiibwa." Nwamonu anyi? "Ne, monaayi, Ndi nnutumina Eliya muprofeta kumpala kwa dituku dinene ne didi dikwacisha bwôwà dya Mukalenge. Yèyè nealujulule myoyi ya bantu kudi Taatù." Nwamonu anyi? Nwamonu anyi?

¹⁹⁵ "Ne pashiishe baakane nebapatuke benda bendela pa beena—beena lwonji, butu." Nebooshike bu cikutu cya kapyà, nwamonu's, buloba nebwohike. Tudi tumona ne bwôbù nebukuluke mwamwa. Ne volcan neamwangalake pa buloba eku ne eku, ne mau lu neakwate kapyà.

Éyì Lubwebwe lwa Bikondo, ikalaku naanyi luse mpindyewu, ne pa diine dîbâ adi.

¹⁹⁶ Wetwawu! Ee, cintu cimwepele, udi ne disaamà dya bainâbânzà, disaamà dya bânà bakaji. Udi ne bikwabo bintu. Udi ne mutu ukunyunguluka, anu pa bukole bwine bwa kupeta

dìsaamà dya mutu ukunyunguluka. Ntatu mikodyakanangane ya mishindu yònsò. Kadi udi kabidi ne dijinga, ndya ne, upete Nyuma Mwímpè. Aci ncyà bushuwa. Ki cyòci. Udi witabuuja ne udi. . . Ukaadi mutonde kantu ne kantu anyi? Udi witabuuja ne mèmè mukutentekele byanza ne mulombe Nzambi bwa kucyenza, Nyuma Mwímpè nealwe anyi? [Mwaneetu wa bakaji udi wamba ne: “Eyowa.”—Muf.] Udi witabuuja nanku anyi? [“Eyowa’s, mukalenge.”] Tusambilaaku.

¹⁹⁷ Nzambi munanga, nyewu ntentekela mukaji ewu byanza, mu mushindu wa bapostolo, ne ndomba bwa apete dibatiiza dya Nyuma Mwímpè. Mu Dìnà dya Yesu Kilisto, swaku aMupete. Amen.

¹⁹⁸ Kùcyèdì mpatà to. Ngwebè wèwè, wamonu’s. Ngwebè. N’Dyâmpà dya—dya bânà.

¹⁹⁹ Wèwè’s umvu bikwenza cintu kampana pângãmbi ne, “dìsaamà dya bânà bakaji,” kî mmwòmò anyi? Bwalu ncyúvwà naaci, wèwè peebe. Mpindyewu udi witabuuja ne newikalè bímpè mpindyewu anyi? Ndaaku, mwikàle anu usakidila Mukalenge.

²⁰⁰ Wetwawu! Udi witabuuja ne mwoyi webe wònsò anyi? Udi witabuuja ne neubange kudya mushindu wúvwà ne ciibidilu cya kudya kukaadi ntanta mule awu anyi? Eyo. Ndaaku, wãmbè ne: “Twasakidila, Mukalenge. Ndi nciitabuuja.” Bwikadi bwa Mukalenge.

²⁰¹ Udi witabuuja ne dìsaamà dya nyima adi nedikumuke ne neúmvwè bímpè anyi? Eyo. Ndaaku wèwè anu cyanaana, wenda wamba ne: “Twasakidila, Nzambi munanga,” ne Nzambi neàcyènzè.

²⁰² Udi witabuuja ne udi mwa kuumvwa bímpè, ne Mukalenge neakupe bukole bwa mubidi, ne kwakwikala kabidi ne binyoka, muumvwe bímpè ne mubidi tumatuma anyi? Udi witabuuja nanku anyi? Ndaaku, wenda uMusakidila, wamba ne: “Mukalenge, ndi nciitaba ne mwoyi wanyi wònsò, ne ndi nciitabuuja.”

Nwènù bònsò badi aku abu nudi nwitabuuja cinyi bwa Cyòci aci?

²⁰³ Wèwè udi apa ewu, tentekela mukaji udi musòmbè ku luseke lwebe menemene awu cyanza, umwambile ne mijilu ya mikolo yidi mimùle ne binyoka abi nebimuumuke. Pìikalàye. . . ? . . .

²⁰⁴ Nzambi akubeneshe. Udi witabuuja ne neúmvwè bímpè mpindyewu anyi? Alukilaaku mwebe úmvwè bímpè. Nzambi akubeneshe. Kwata njila ndaaku, wãmbè ne: “Twasakidila, Mukalenge Yesu.”

²⁰⁵ Wetwawu! [Mwaneetu wa bakaji awu udi wamba ne: “Butumbi kudi Nzambi.”—Muf.] Udi witabuuja ne dìsaamà dya bânà bakaji adi nedikumuke peebe anyi, wèwè? [“Ndi

ngiitabuujā.”] Ne neŭmwè bîmpè anyi? [“Twasakidila, Yesu.”] Ndaaku, wāmbè ne: “Twasakidila, Mukalenge.” [“Twasakidila, Yesu.”]

²⁰⁶ Wetwawu! [Mwaneetu wa bakaji udi wamba ne: “Ndi mudipande nsoso wa cinù.”—Muf.] Mona’s, ekelekele, ekelekele! [“Totten.”] Ndi mumanye dîna dyebe. Mvwa—mvwa ne ciibidilu cya. . . [“Totten.”] pâmvwâ ngenza bumpaasata bwa ekeleeziya wa ba-Baptistes. [“Totten.”] Totten. [“Della Totten.”] Mwaneetu wa bakaji Della Totten. Udi usaama dîsaamâ dya nyima mpindyewu. [“Eyowa.”] Nebiikalè bîmpè, mpindyewu. Udi witabuujā ne Yèyè neakusangaje anyi? [“Eyowa.”] Udi muvuluke cyâkenzekâ kuntu kwine aku mu ekeleeziya wa ba-Baptistes wa Milltown awu kukaadi bidimu anyi? [“Eyowa, ndi muvuluke bwalu abu!”] Yèyè ucicidi anu Nzambi umwèumwè awu leelu ewu. [“Kaa, Nzambi twasakidila!”] Nzambi akubeneshe, mwaneetu wa bakaji.

George Wright, udi lwà penyi? Udi muvuluke anyi? Ekelekele, mushindu mwine. . .

Udi witabuujā ne, mêmè anu mukutentekele byanza, ne dilaabiibwa edi, udi witabuujā ne neŭmwè bîmpè anyi? Lwâku apa. Mu Dîna dya Yesu Kilisto swaku yèyè ondopiibwe. Amen. Ikala ne diitabuujā!

Ee, nwènù bônso nudi nwitabuujā ne mwoyi wônso anyi? [Disangisha didi dyamba ne: “Amen.”—Muf.]

²⁰⁷ Mpindyewu, bwîmpè bwine budi biine bivulukilu abi bitwala’s we, pa kumona inâbânzâ wawa! Ncyêna mwa kwanji kuvuluka dîna dyende to, bwa mpindyewu, kadi ndi. . . [Muntu mukwabo udi wamba ne: “Totten.”—Muf.] Totten. Totten, ncyā bushuwa. Kaa, eyowa, mwanende wa bakaji uvwa m’Bertie. Ncyā bushuwa. Ncyā bushuwa menemene. Kanwedi meeji ne ndi mujimije lungenyi to, ndi anu bu mushaale mukese, nudi bamanye, cidu anu bu. . . Ncyêna mwa kucyumvwijaku to.

²⁰⁸ Kadi dîsaamâ dyebe dya nyima’s dyamanyi kuya, inâbânzâ. Ndaaku, utumbishe Mukalenge, wāmbè ne: “Twasakidila, Mukalenge.”

²⁰⁹ Udi witabuujā ne dîsaamâ dyebe dya mwoyi nedijike paadi anyi, dyôdi adi? [Mubeedi awu udi wamba ne: “Eyowa.”—Muf.] Ndaaku anu cyanaana, usanke, wāmbè ne: “Twasakidila, Mukalenge Yesu,” mwikâlè uCiitabuujā. Eyo. Ikala ne diitabuujā mpindyewu. Kwedi mpatâ to.

²¹⁰ Lwâku, inâbânzâ. Udi witabuujā ne mwoyi webe wônso anyi? Udi ne bintu byâbûngî bidi bikusaama. Udi kabidi ne dîsaamâ dya nyima, wêwè. Udi witabuujā ne Nzambi neikale mwa kukusangaja anyi? Eyo, ndaaku anu cyanaana, wenda usanka. Aci, Yèyè ngudi ukufikisha ku didyumvwa mushindu awu awu. Sakidila Mukalenge. Nzambi akubeneshe, mwaneetu wa bakaji.

211 Mwoyaawu, mwanaanyi wa balume. [Mwânà wa balume awu udi wamba ne: “Ee mwoyi!”—Muf.] Udi witabuuja ne Nzambi neondope mutu udi unyunguluka mwânà awu ne neamusangaje anyi? Udi uciitabuuja anyi? Eyo. Mwoyaawu, mulunda wanyi, enzabi nkulabuleku ku cyanza tûng.

212 Nzambi munanga, umushaku cintu cibi aci pa mwânà wa balume mutekete ewu, ne swaku bwa yèyè ikalè ne mwoyi ne ikalè mùdì bantu bônso. Mu Dîna dya Yesu, Amen.

213 Nzambi akubeneshe, mwaneetu wa balume. Udi witabuuja aci, s’mmwômò’s? Neúmvwè bîmpè. Kwediku mpatà to nansha kakese.

214 Mwânà be bwa kwikalaye ne dîsaamà dya mwoyi. Udi witabuuja ne Nzambi nekusangaj anyi? [Mubeedi awu udi wamba ne: “Eyowa’s, mukalenge.”—Muf.] Ndaaku, wămbè ne: “Twasakidila, Mukalenge, bwa dingondopa.”

215 Udi witabuuja ne Nzambi neondope dîsaamà dya cifu ne neakusangaje anyi? Ndaaku, usankaaku, wămbè ne: “Twasakidila, Mukalenge.”

216 Yèyè ucidi anu Nzambi, kî mmwômò anyi? [Disangisha didi dyamba ne: “Amen.”—Muf.] Cintu cimwepele cidi cikengela nwênù kwenza cidi anu nkwitabuuja. Aci kî ncyā bushuwa anyi? Nudi nwitabuuja Mwânà wa muntu mu matuku a ndekeelu anyi?

217 Kwènzèkì cintu kampanda kaaba aka anu tusunsa tukese etu, kadi mêmè ncyēna mwa . . . nteeta bwa kupeta ne civwa mpenyi. Muntu kampanda uvwa ne diitabuuja ne mwenze cintu kampanda. Anyi, pàmwăpa nêmmupetè mu dyalumingu dilwalwà, anyi pângââpetà mushindu. Wèwè—wèwè udi . . . S’ki cyôcì aci cyakabidi. Udi ne cyanza cyebe cyela muulu. Udi witabuuja ne Nzambi udi mwa kwondopa dîsaamà dya mwoyi adi, kukusangaja, kwondopa mwaneebè wa bakaji awu ku—ku . . . Udi uciitabuuja anyi? Mandamu Neff, udi witabuuja ne Nzambi. . . Leo Neff. Mêmè ncitu mukumanye to, kadi ki dîna dyebe adi. Wèwè udi ne dîsaamà dya mwoyi, ne mwaneebè mukese wa bakaji udi ne dîsaamà dya twonyi. Udi witabuuja ne yèyè neúmvwè bîmpè anyi? Diitabuuja dyebe dyakondopu. Itabuuja ne mwoyi webe wônso.

218 Wèwè udi paanyima pààpa mu ciinà cya mâyi wawa, mwimane paanyima pààpa ne dîsaamà dya cifu, Yesu Kilisto wakusangaji.

219 Nudi nwitabuuja anyi? [Disangisha didi dyamba ne: “Amen.”—Muf.] Yèyè udi umwèumwè awu makeelela, leelu, too ne kashidi. Tutentekelanganaayi byanza muntu ne mukwende mpindyewu. Kaa, anji elaaayi meeji bwa dîbà ditudi ne mwoyi, elaaayi meeji bwa cikondo. Elaaayi meeji ne tudi tusanganyiibwa mu Bwikadi mene bwa Yesu Kilisto, Mwânà wa Nzambi. Yèyè ngwâkalaya ne Neènzè cyôcì eci mu matuku a ndekeelu. Nyewu ndi ne byanza byanyi bitenteka pa mishwala eyi.

220 Nzambi munanga, ndi ndomba bwa Wèwè kubeneshaku mishwala eyi bwa dyondopiibwa dya mibidi ya bantu, mu Dîna dya Yesu Kilisto.

221 Mpindyewu, ne byanza byenu bitentekelangana muntu ne mukwende, muntu ne muntu wa kunudi nudi bidimba bya Mubidi wa Kilisto. Nyuma Mwîmpè umwèumwè wâkalaya bwa kusokolola maalu masokome a mu myoyi ne kwenza bintu ebi awu, Yèyè awu ngudi munda mwebe amu. Wèwè udi citupa Cyende Yèyè, ne Yèyè udi citupa cyebe wèwè. Mpindyewu, Yèyè mmwambe nenku: “Bimanyinu ebi nebifile badi biitabuuja.” Ki nwênù aba. “Bôbò batenteketele babeedi byanza, babeedi nebasangale.” Mpindyewu, kudisambididi wèwè mwine to, sambidila muntu ûdi mutenteketele byanza awu, bwalu badi bakudyewu tusambilaayaaku pamwe, ne kakwikadiku muntu ne butekete mu citanda emu to. Mbwa cinyi butudi bafwanyine kwindila kabidi ntanta, mwaneetu wa balume, mwaneetu wa bakaji, s’ki Yèyè ewu, Nyuma Mwîmpè, Nzambi, kaaba aka mene, Cintu ciine cyena bwalu butwâmbi aci.

222 Yesu munanga, nyewu tujungulula Bwikadi Bwebe. Wèwè wâkaaluja mwânà mukese awu ku mwoyi dituku adi, paanyima paa yèyè mumane kufwa, ku disambila dya diitabuuja. Nzambi munanga, kudi bàâbûngì kaaba aka batudi katuyi mwa kufika mwaba udibo to, dîbà ndyedi dyenda dipita, kadi mbatentekelangane byanza muntu ne mukwende. Mbeena kwitabuuja. Tudi basômbe mu Bwikadi bwa Mukalenge Yesu Kilisto, mubiishiibwe ku bafwe, umwèumwè awu makeelela, leelu, too ne kashidi.

223 Sataana, udi mucimunyiibwe! Yesu Kilisto wakakucimuna! Yèyè wakabiika ku bafwe ne mmwimane munkaci mwetu diloolo edi, mwikàle ushindika Mukenji ewu wa ku matuku a ndekeelu. Patuka munda mwa bantu aba! Ubashiile kaaba, mu Dîna dya Yesu Kilisto! “Mu Dîna Dyanyi bôbò nebiipate badémóns,” ne wèwè udi mwipaciibwe. Mu Dîna dya Yesu Kilisto, shiya disangisha edi!

224 Ewu yônsò wa kunudi mpindyewu udi witabuuja dyondopiibwa awu, ajuukile kuulu. Ewu yônsò udi witabuuja dyondopiibwa awu, ajuukile kuulu. Elaayi byanza muulu mpindyewu nuMutumbishe!

“Ndi mpindyewu ngiitabuuja dyondopiibwa dyanyi,” ambiläku Nzambi cyôci aci. Ndi mpindyewu ngiitabuuja dyondopiibwa dyanyi. [Disangisha didi dyamba ne: “Ndi mpindyewu ngiitabuuja dyondopiibwa dyanyi.”—Muf.] Wèwè udi umwèumwè awu makeelela, leelu, too ne kashidi, Kilisto. [“Wèwè udi umwèumwè awu makeelela, leelu, too ne kashidi, Kilisto.”] Ndi mpindyewu nKwitabuuja. [“Ndi mpindyewu

nKwitabuuja.”] Kwacishaaku bupidya bwanyi. [“Kwacishaaku bupidya bwanyi.”] Amen. [“Amen.”]

NêmMutùmbìshè, nêmMutùmbìshè,
Tumbishaayi Mwânà wa mukooko mushipa
bwa bangènzàmpèkààtù;
Mupeeshaayi butumbi, nwênù bantu bônso,
Bwalu Mashi Ende mmasukùle ditoba dyônso.

²²⁵ Kanwenaayi baMunange anyi? [Disangisha didi dyamba ne: “Amen.”—Muf.] TuMutumbishaayaaku. Bantu bônso, ne byanza byenu byela muulu, Mupaayi butumbi, padi mwaneetu ulwa mwab’ewu bwa kututangalajaye apa.



CYAKUDYA CYA NYUMA MU MUVU WACI LUA65-0718E

(Spiritual Food In Due Season)

Diyiisha edi dya Mwaneetu William Marrion Branham dyakayiishiibwa bwa musangu wa kumpala mu Anglais mu dyalumingu diloolo, mu matuku 18 a ngondo wa mwandamutekete, cidimu cya 1965, mu Branham Tabernacle mu Jeffersonville, Indiana, U.S.A. Ndyumusha pa mukaba wa mēyi ne dituuta ku cyamu mu kaabujima kâadi mu Anglais. Nkudimwinu wa mu Ciluba ewu mmutuuta ku cyamu ne mwabanya kùdi Voice Of God Recordings.

CILUBA

©2021 VGR, ALL RIGHTS RESERVED

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org

Dîyi dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org